

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



MAFUTAGA AUTALAVOU



AUKUSO - TESEMA

2019

AUKUSO 11,2019. "SU'ESU'EGA I LE TUSI PAIA."

MATAUPU: "E manuia, e malamalama ma lelei mea uma, pe a amata I le Agaga o le Alii."

TUSI FAITAU: KENESE- 1: 1- 5.

FA'ATOMUAGA: O le igoa Kenese, o le igoa lea ua fa'aigoaina ai le ulua'i tusi o le Feagaiga Tuai. Ua fa'aigoaina i le gagana Eperu o le **'beresit'**, o lona uiga, **'I le amataga'**, 'in the beginning'. O le masani a le Iutaia, aemaise lava i ulua'i tusi e lima o le Feagaiga Tuai ua ta'ua o le Penetatiuka (Pentateuch), (Kenese- Teuteronomie), sa latou fa'aigoaina ma fa'aulutalaina a latou tusi i ulua'i upu o lo'o amata ai le tusi. O le ala lea i le faitau a le Iutaia, o le ulua'i tusi o le Feagaiga Tuai o le 'beresit'--- 'I le amataga.'

A e ina ua fa'aliliuina le Feagaiga Tuai i le gagana Eleni (Septtuagint---LXX), sa latou fa'aigoaina le ulua'i tusi, o **Kenese**, aua o le upu Eleni o le 'genesis', o lona uiga o le 'amataga'. (Genesis means origin). Ua avea lava le fa'aigoaina o lenei ulua'i tusi o le Kenese, ma ala ua fa'amatalaina mai ai le amataga o le foafoaga paia a le Atua, fa'atasi ai ma le amataga o le talafa'asolopito o Isaraelu, ina ia fai i latou ma nu'u filifilia o le Atua. (Genesis tells of the origin of creation, as well as the origin of the history of Isarael, as well as the history of humanity).

FESOASOANI MO LE MATAUPU.

(1). Kenese 1: 1 **"Na faia e le Atua le lagi ma le lalolagi i le amataga."**

O le Atua foafoa, o le Atua amata mea, o le Atua na faia mea uma lava. (In the beginning, God created). O le Atua mai le vavau e o'o lava i le fa'avavau. O lona Poto ma lona mataisau ma lona lava finagalo paia, na ia faia ai le lagi ma le lalolagi.

(2). Kenese 1: 2 (i). **"Sa so'ona nunumi le lalolagi ma ua gaogao....."**

O le manatu o le to'atele o le 'au su'esu'e o le Tusi Paia, o le ata manino lea o le ex- nihilo, (out of nothing,) o lona uiga na faia e le Atua le lagi ma le lalolagi ma mea uma o lo'o tumu ai, mai le leai o se mea. (God created out of nothing).

(ii) **"...sa ufitia fo'i le moana i le pouliuli..."**

O le ata lava lea o le ex-nihilo, o le lalolagi nunumi ma le gaogao, ae sa ufitia le moana i le pouliuli. O le manatu o le 'au su'esu'e i le Tusi Paia, o le upu Eperu o le 'tehom', o le 'loloto po'o le 'deep', a ua fa'asamoaina o le 'moana'. O le tulaga lea o lo'o manino mai ai le leai o se mea i le amataga. O le ala fo'i lea ua fa'auigaina ai le pouliuli... o le mea e leai se ola, ma le leai o se malamalama, sa ufitia ai le moana. O le ata manino o lo'o taumafai le tusitala o Kenese e fa'amatala mai, e ui lava ina sa leai se mea i le amataga, ae sa i ai ma soifua pea lava le Atua o Lē ona le foafoaga. (in the midst of the chaos and formless void, God was and is present.)

(iii) **"...na fegaioia'i fo'i le Agaga o le Atua i le fogātai."**

O le Atua foafoa e ala i lona Agaga. O le upu Eperu 'ruah', ua fa'auigaina o le 'Agaga' (Spirit) o le Atua. E i ai fo'i e taofi o le ruah e peisea'i o se matagi po o se savili ua agi mai. Ae peita'i, o le manatu o le to'atele o le 'au su'esu'e o le Tusi Paia, o le ruah o le Agaga o le Atua lea na te galueaina mea uma o le foafoaga, (ruah is the creative, active and divine Spirit of God). O le molimau a le tusitala o le Kenese, e ui lava ina sa nunumi ma gaogao le lalolagi, e ui lava fo'i sa ufitia le moana i le pouliuli, ae na fegaioia'i ai le Agaga o le Atua i le fogātai. O lona uiga, na afua ma amata mea le Atua i le

foafoaga e ala i lona Agaga. O le ex- nihilo (out of nothing) na galueina e le mana foafoa o le Atua e ala i lona Agaga.

(3). Kenese 1: 3. **Ua fetalai mai le Atua ia malamalama, ona malamalama ai lea.**

O se va'aiga fa'amataupu silisili, o le ata manino lea o le Atua foafoa e ala i lana fetalaiga. I le tala o le foafoaga, ina ua faia e le Atua le lagi ma le lalolagi i aso e ono, o lo'o i ai upu ia-, Ua fetalai mai le Atua.....ona....." Ua fa'atulagaina le foafoaga atoa e ala i le fetalaiga a le Atua, na galueaina ma fa'atinoina e le Agaga o le Atua. (The words, God said Let there be.....and there was....denotes creative ordering proceeded by mere executive decree carried out by ruah, the Spirit of God).

(4). Kenese 1: 4-5. **Ua silasila atu le Atua i le malamalama ua lelei.. Ua fa'aigoa e le Atua le malamalama o le ao, a ua fa'aigoa e ia le pouliuli, o le po."**

Ua silasila atu le Atua i lana foafoaga, ua matagofie ma lelei mea uma ua na faia. O le fa'aigoina fo'i e le Atua o le malamalama o le ao, ma le pouliuli o le po, o le fa'aailoga manino lenā o le pule aoao o le Atua i lana foafoaga. O le Agaga na galuea'ina ai le foafoaga atoa ua lelei ma matagofie ai mea uma ua fai.

MANATU E FIA FA'AMAMAFAINA.

O le fa'amamafa o lenei mataupu, ia tatou amata i le Agaga o le Atua, e manuia, e malamalama, e lelei ma matagofie ai mea uma tatou te faia. E pei fo'i ona molimauina i le tusi o Kenese- 1:1- 5, mo lenei Aso Sa. Ia tatou amata i le Agaga o le Atua. O le lagi ma le lalolagi ma mea uma ua tumu ai, na foafoaina e le Atua e ala i lona Agaga. O le lalolagi sa so'ona nunumi ma gaogao, ma ufitia le moana i le pouliuli, ae na fegaoioia'i le Agaga o le Atua i le fogātai. (Out of the chaos and formless void, the Spirit of God hovered over the waters). O le ata manino lava lea o le amata i le Agaga o le Atua, aua e iai le Atua i mea uma. Atonu o se fa'amanatu tāua lenei mo i tatou tupulaga talavou, aemaise lava i mafutaga fa'ale-autalavou, ina ia tatou amata i le Agaga o le Atua, e lelei ma matagofie ai mea uma tatou te faia. Ma aveva ai o tatou tupulaga o ni tupulaga e fialia mai i ai le Alii. O le mea e i ai le Agaga, o lo'o afio ai le Atua. A tatou amata i le Agaga o le Atua, e manuia lo tatou alofaiva i feau ma galuega ua vala'auina ai lo tatou ola taumafai mo Keriso. Po o le a lava fo'i lo tatou vaivai ma le lē atoatoa, po o le a lava fo'i lo tatou so'ona nunumi ma le gaogao, ae afai e fegaoioia'i le Agaga o le Atua i o tatou talavou, e galueaina lava i tatou e le mana o le Atua, ma e tauto'aluaina i tatou e lona lava Agaga. Ina ia silasila mai le Atua i o tatou talavou, o tupulaga ua lelei ma matagofie i ona fofoga, auā na ia faia i tatou i lona fa'atusa paia.

FA'ATINOGA O LE SU'ESU'EGA.

1. Fa'aailoa le mataupu i le Autalavou.
2. E mafai ona vaevae le Autalavou i vaega, ia po o le su'esu'e fa'atasi fo'i e fua i le aofa'i o le Autalavou
3. Afai e galulue i vaega, ia tu'u atu i vaega fuaiupu o le tusi faitau e su'esu'e i ai. Sailiili po o le a so latou fa'auigaina o ia fuaiupu.
4. O le faiga lava fo'i lea pe a su'esu'e fa'atasi le Autalavou atoa.
5. Ia taualuga i le fa'amalamalama a le ta'ita'i i vaega ta'itasi o le tusi, e pei ona taumafai atu ai i le fesoasoani mo le mataupu i le Kenese 1: 1- 5.
6. Fa'ai'u i le pese 183..... ma se tatalo e saunia e se tamaita'i talavou.

AUKUSO 18, 2019. “SU’ESU’EGA I LE TUSI PAIA.”

MATAUPU: “O TATOU TUPULAGA OFOINA ATU MO LE ALI’I, E LĒ ILOA I LUMĀFALE, A’O LE ‘ANOFALE.”

TUSI FAITAU- MATAIO- 23: 23-36.

SINI E FIA TULILOA: “Ia fetufaa’i ma fa’atalanoa le mataupu ina ia malamalama lelei i ai tupulaga o le Autalavou, ma taumafai e ola ai i le loto ta’utino fa’amaoni, ae le o le teuteu o lumafale i upu fa’afoliga.”

O le talafa’asolopito o le nu’u o Isaraelu, o lo’o atagia mai ai, o lana aganu’u, ma lona olaga o aso uma, e totonugalemū i le feso’otaiga i lo la va feagai ma lona Atua. O le tulaga aoao tetele o le sosaiete, o lo’o atagia mai ai fo’i le tulaga ese lava o ta’ita’i fa’ale-lotu mai le tele o tagata lautele. O ta’ita’i fa’ale-lotu, e sili ona aloa’ia ma fa’aaloogia (respected ones), ma aupito sili ona paoā ma malolosi (powerful figures), i taimi uma lava. O Tusiupu, o tagata e popoto ma malamalama tele i tulafono. O Faresaio, o se vaega o tagata Iuta ua vavae’ese, ua taofi tele i latou i uputu’u, ae ua fultua ma lafoa’i le Afioga a le Atua. Ua taga tutusa lava la Tusiupu ma Faresaio i o la tulaga i totonu o le sosaiete, auā ua la fa’amamafa le tausia o tulafono, ma le mulimulita’i i upu-tu’u. E lē o le fa’amoemoe ia fa’aolaina ai tagata, ae ia saga fa’ateleina ai pea lo latou lelei i le va’aiga a tagata. E ui lava la i lo latou tāua i le fa’avasegaina o tagata o le sosaiete, ae le’i poi ai le fa’asea a Iesu, ma le tu’ua’ia o i latou i lo latou le fa’amaoni. Na ona teuteu mai o lumāfale i a latou upu ma amio fa’aalia, a o totonu o loto (‘anofale), e tumu i le matape’ape’a ma le fa’aatuatuvale. Ma ua avea fo’i lo latou mana’o ma ala ua matuā pogisa ai o latou mata fa’ale-agaga i le va’ai atu ia Iesu, ma ua punitia ai fo’i ma o latou lagona alofa i tagata lautele.

MANATU FESOASOANI: O lo tatou gaua’i, ma lo tatou loto atu fa’amaoni i le Atua, e tatau ona sili mamao atu nai lo mea tatou te fa’aalia atu i le tino i fafo. O ā mea tatou te faia ma tautatala ai, e tatau ona atagia mai ai lo tatou matuā si’ilima atoatoa i le Atua ma lona finagalo e ala i fa’atinoga matagofie lava, ae lē o le fa’afoliga ina ia tosina mai ai isi tagata. O le tagata lava ia e tosina i mea e aliali mai, a’o le Atua e silasila ma na silafia le mea o i totonu o le loto. E fiu a la le tagata e teuteu atu ona lumāfale i fafo, a o le Atua lava ia e silasila i totonu i le ‘anofale. (1 Samuelu 16: 7).

FA’ATINOGA O LE MATAUPU. E lē o i ai se manatu e vavae le Autalavou, ae o le a fetufaa’i fa’alaua’ite. E saunoa atu lau Susuga i ni fesili, ae tali fa’asolo mai latou. Latou te fesili atu fo’i, ae tali e lau Susuga ma isi o le Autalavou. E lelei le faiga lea i lenei Aso Sa, e te silafia ai, ua malamalama uma tagata ta’ito’atasi i le mataupu, ina ia mafai ona tini le sini o fia tuliloa. Ua tu’uina atu nai fesili i lalo, ma se fa’aopoopo a lau Susuga i le ta’ita’i, pe a tusa i lou finagalo.

FESILI:

1. O le fa’aseā a Iesu i le fuaiupu e 23, o lo’o tāua ai le sefulu a’i, o lona uiga ea ua le toe aoga lea mea, po o lo’o tāua pea?

2. E mafai ona e tautino mai, e i ai se vaega o lou soifuaga, o e soifua ai fa'a-Tusiupu ma ola fa'a-Faresaio?
3. Fa'ai'u i se saunoaga fa'alaei'au a lau Susuga i le Faifeau/Ta'ita'i, ia ta'ape le mafutaga ma ni fa'alumaga fa'ale-agaga e aoga mo lo latou ola.

Manuia le fetufaa'iga.

////////////////////////////////////

AUKUSO 25, 2019. FA'AFINAUGA / DEBATE.

MATAUPU: FESO'OTAIGA FA'A-TEKENOLOSI: O SE MEA LELEI LEA MO TUPULAGA, PE LEAI?

Information Technology: Does it have a positive or negative influence upon our youth?

UPU TOMUA:

O le fa'amoemoe maualuga o lenei mataupu, e le o le saili o se itu e malosi ma lelei la latou finau. Ae ia avea lenei metotia o le fa'afinauga (debate), e mafai ona fetufaa'i ai ma fefa'asoa'i ai le Autalavou i o latou manatu ma lagona e uiga i lenei mataupu o Feso'ota'iga fa'anei-ona-po, po o Fa'amaumauga ma fa'amatalaga fa'a-tekenolosi (Information Technology).

SINA FESOASOANI MO LE MATAUPU.

Ua tatou molimauina i nei ona po le televave o le atina'eina o aiga ma nu'u, aemaise atunu'u ona o le fa'aaogaina o lenei metotia fou ua ta'ua o Feso'ota'iga fa'a-tekenolosi (Information Technology). Ua tatou molimauina le to'atele o o tatou tagata, aemaise o fanau ua iloa ma fiafia e fa'aaoga komepiuta (computer). Ua tele fo'i mea o le olaga masani ua fa'afaigofie ona tatou maua ma fa'atinoina, ona o le feso'ota'iga fa'a-tekenolosi.....e pei o:

1. Feso'ota'iga fa'a e- meli (chat rooms).
2. Su'esu'ega e faia i luga o le internet. (research).
3. O le fa'aaogaina o ATM, masini e teu ma tala ai tupe.
4. Ua mafai fo'i ona faia fa'atauga masani o le vaiaso a aiga i luga o le internet e aunoa ma le tu'ua o le fale (online shopping), ma isi lava mea fa'apena.

Ua i ai fo'i nisi o aulotu ma Ekalesia ua fai lava a latou "websites" e fa'amatalaina mai ai mea o lo o tutupu i totonu o aiga, nu'u ma Ekalesia. Ae le gata i lea, o se auala fo'i lea ua mafai ai ona fesoasoani mai ai tama fanau o nu'u ma alalafaga o lo'o aumau i atunu'u mamao, mo ni galuega tetele ma ni fa'amoemoga a nisi aulotu, e pei o le fausiaina o falesā ma maota o galuega. Ae le gata i lea, ua tatou molimauina ma matauina le to'atele o tagata, aemaise lava tupulaga ua tofusua ma telefoni fe'avea'i. O nei mea uma ua mafai ona tatou maua ma fa'atinoina, ona o Feso'otaiga Fa'a-tekenolosi. E peisea'i ua la'iitiiti ma lata mai le lalolagi ina ua i ai le feso'ota'iga fa'a-tekenolosi. (The world has become smaller and closer because of Information technology).

Peita'i, ua i ai fo'i ma mea le lelei, ma mea le manuia, ua aliali mai, ma ua tatou iloa, ona o le feso'ota'iga Fa'a-tekenolosi, e pei o nei:

1. E ui ina ua faigofie feso'ota'iga i le fa'aaogāina o komepiuta, a ua taugatā le totogiina ma le fa'atupeina, aemaise lava i le fa'aaogāina o le uila (power).
2. A tatou vāai i faiga a tagata fa'atupu fa'alavelave (terrorists), ua latou fa'aaogāina le feso'ota'iga fa'a-tekenolosi ma ala e fausia ai a latou pomu ma nisi o 'aupega latou te fa'aaogāina ina ia fa'aumatia ai le soifua ma le ola o tagata i a latou fuafuaga leaga.
3. Ua tele fo'i ina vevesi aiga i le va o matua ma fanau, le va o le tane ma le avā, po o le tamā ma le tinā, ona o feso'ota'iga i luga o telefoni fe'avea'i, fa'atasi ai ma feau tusitusia (text messages). Ua avea ma ala o le lē talitonu ma le masalosalo o le tasi i le isi.

O le ala lea ua aumaia ai lenei mataupu e fai i ai se fetufa'aiga ma se fefa'asoa'iga, e ala i le fa'afinau o manatu ma lagona. Ina ia mafai ona nofo malamalama ai tupulaga talavou i le fesili ua fa'avaeina ai lenei mataupu. **“E lelei pe lē lelei le feso'ota'iga fa'a-tekenolosi, mo tupulaga i nei ona po?”**

FA'ATINOGA O LE MATAUPU.

1. E lelei pe ā vaeluaina le Autalavou i vaega e lua. O le tasi vaega o i latou ia e lagolagoina pe IOE i le mataupu. O le isi vaega o i latou ia e tete'e pe LEAI i le mataupu. Taumafai lau Susuga a le Ta'ita'i ia vaevae tutusa le autalavou ia paleni uma vaega.
2. Fa'amatala e lau Susuga le mataupu o le ā fai i ai le fa'afinauga.
3. Tu'u atu se avanoa 15 minute e fa'atalanoaina ai e vaega ta'itasi le mataupu, ina ia mafai ona maua ni o latou manatu. E lelei fo'i ona tusia i lalo i se pepa o latou manatu fa'aali, aua e fa'afaigofie ma malamalama ai le mataupu pe ā toe fa'atasia mo le fa'atinoaina o le fa'afinauga.
4. E filifili lava e le vaega o latou sui e to'alima (5) e faia le fa'afinauga. Ia tu'u i ai le avanoa pe tusa ma le tolu (3) minute a le sui e to'atasi e fa'aali ai ona manatu, ona felafolafoa'i ai lea i vaega e lua.
5. O le tāua lava o le fa'aaogāina o lenei metotia o le fa'afinauga, ina ia mafai ona fa'atāuaina uma manatu ma lagona e fa'aalia, ae aua ne'i fa'aleaogāina se manatu o se tasi.
6. E mafai ona vala'auina ni sui o le tou Ekalesia e fai ma fa'amasino.
7. Ia saunia e lau Susuga i le Faifeau se saunoaga e ta-aofa'i ai manatu uma e fa'aalia, e uiga i le mataupu o le finauga.

O nai manatu ia e mafai ona fa'aaoga e fesoasoani i lau susuga a le ta'ita'i e fesoasoani ai i vaega ta'itasi, pe a mana'omia sau fesoasoani.

VAEGA IOE. (LAGOLAGOINA LE MATAUPU).

E lelei ma aogā feso'ota'iga fa'anei-ona-po ona:

- E mafai ona fetufaa'i ma fefa'asoa'i ai tagata lautele i ni mataupu i luga o le internet.
- Ua faigofie ma vave feso'ota'iga i le va o atunu'u e mamao, fa'atasi ai ma le faigofie o le fa'aaogāina o telefoni fe'avea'i ma feau tusitusia. (text messages).

- Ua mafai ona su'esu'eina ai e le to'atele o tagata ni mataupu fa'apitoa i luga o websites.
- Ua tele ina fa'aaogāina e fanau ma tupulaga e su'esu'e ai mataupu mo a latou mea a'oga (research).
- Ua mafai fo'i ona tatou iloa talafou ma tala mai atunu'u mamao i mea o lo'o tutupu mai so'o se vaipanoa o le lalolagi i se taimi vave lava. (quick access to world news and events).

VAEGA LEAI. (TETE'E I LE MATAUPU).

E lē lelei ma leaga feso'ota'iga i nei ona po ona:

- Ua lē toe malu puipuia ai le aia tatau ma le sa'olotoga o le tagata.
- Ua tele fa'asalalauaga ma ata lē talafeagai ua fa'asalalauina mai i luga o le internet.
- Ua mafai ona fa'aaogāina e tagata leaga ma tagata fa'atupu fa'alavelave le internet mo a latou osofa'iga.
- Ua to'atele tagata fatu pese ma tagata fai ata tifaga ua a'afia, ina ua faia e isi tagata kopi le fa'atagaina o a latou taumafaiga.
- Ua tele fo'i ina leiloa e matua mea o lo'o faia e le fanau pe a fa'aaogāina komepiuta ma telefoni fe'avea'i, e fai ai a latou fe'au tusitusia.
- Ua i ai su'esu'ega a nisi foma'i e fa'apea, e mafai ona a'afia le mafaufau o le tagata pe ā umi ona nofo i luma o le komepiuta e aunoa ma se fa'amalositino e faia. (a dependency mode develops whereby the user loses confidence within themselves and as such, they have a low self-esteem)

FA'AIUGA:

E i ai lava le upu a le atunu'u, "o le uta a le poto e fetāla'i, a'o le uta a le vale e taofi mau.' O le ola fetufaa'i ma le ola fefa'asooa'i, o se tasi lea o fua fa'aaliali o le loto fesoasoani o le Kerisiano fa'amaoni, ina ia ola manuia ai le isi uso a tagata. O le fetufaa'i ma fefa'asooa'i i mea lelei ina ia atia'eina ai le isi tagata, o le agaga tonu lava lea sa i le Aposetolo o Paulo, e pei ona ia tusi atu ai i le Ekalesia i Kalatia----"O lenei, ia tatou agalelei, ia fa'atautu i mea e tutupu i lea aso ma lea aso, i tagata uma lava, aemaise i le aiga o le fa'atuatua. (Kalatia-6: 10).

I lenei vaitau, aemaise i le tele o suiga i le olaga fa'a-onapo-nei, e lelei ma aogā feso'ota'iga fa'a-tekenolosi, auā le atia'eina o le tagata lava ia, aemaise fo'i o lona aiga, nu'u ma lana Ekalesia. Ua tatala mai le faitoto'a o le 'oa ma le tamāoaiga fa'ale-maufaufau e mafai ona ulufale atu ai fanau ma tupulaga, auā so latou lumana'i manuia.

Peita'i, e i ai fo'i le itu e ao ona tatou mataala i ai: Ina ne'I avea nei faiga fou ua maua mai i feso'ota'iga fa'a-tekenolosi, ma ala ua solomuli ai i tua le ola fa'ale-agaga o ā tatou tupulaga, ina ua latou maua le poto, a e ua leai se faautauta.

Manuia le finauga.

////////////////////////////////////

SETEMA 01, 2019. “PEPA E FETUFAA’I AI MA FA’ATALATALANOA.” (ASO SA TALALELEI).

MATAUPU: “O LE TALALELEI MA LE SAUĀINA O TAGATA.”

MANATU FA’AMAMAFAINA: IOANE: 10: 10

“Ua ou sau ina ia latou maua le ola ma maua atili ai lava.”

FA’ASOLOGA O LE MATAUPU:

Talu ai ona o le Aso Sā lenei ua fa’apitoa mo le Aso Sā o le Talalelei i Samoa ma atunu’u i fafo, o lea ua manatu ai e lelei pe ā fa’apea ona fa’asolo le a’oa’oga o lenei aso:

1. Ia tutula’i ma le filemu le Autalavou i se minute e tasi, e mafaufau loloto ai ma le alofa, i le ‘au ulua’i misionare, na latou aumaia le Talalelei i Samoa i le tausaga e 1830, atoa ai ma o tatou matua ua lagomau mai i tiasa, o e sa o latou asaina mai le gasū o le taeao o le Talalelei, o lea ua ao ai Samoa ma ua fa’aolaina ai i tatou e le Alii o le Talalelei.
2. Pe a uma le minute e tasi, ona usu fa’atasi lea o le pese 289, fuaiupu 1 ma le tali e usu fa’alua, ona saunia lea e lau Susuga a le faifeau se tatalo pu’upu’u, e fa’afetaia ai le sao tāua a ē na latou mua’i fa’ailoa maia iā i tatou le Talalelei.
3. O le uiga o lenei fuafuaga, ia toe fa’atepa mafaufau o fanau ma tupulaga i le tulaga faigatā o le ala na savalia e le ‘Au Misionare o le Talalelei, atoa ai ma nai o tatou matua ua fai i le lagi la latou folauga, i le tau fa’afailleleina o lo tatou fa’atuatua ia Keriso Iesu le Alii o le Talalelei. E talosaga atu ia fai ma le matuā mamalu lenei vaega, ina ia uigā ma telē se aogā mo tupulaga o le Autalavou ma tatou uma, ina ia lē galo iā i latou lea faiga i le lumana’i.
4. Ona amata loa lea o le fa’atalanoaina o le mataupu.

UPU TOMUA:

O lo’o e soifua ma ou ola i se lalolagi o fa’afitauli. (world of conflicts and tensions). E lē gata i le soifuaga o lo’o ola ai le tagata, ae ua tele ai fo’i ina afaina le si’osi’omaga ma le foafoaga atoa, ona o le ola so’ona fai ma le lē fa’autauta o le tagata. O le ola fa’atamala ma fa’apalapala o le tagata, ua tele ina afaina ai le foafoaga atoa.

O le mataupu lenei o le **SAUĀINA**, e ao pea lava ona manatua, e lē na o le tagata e a’afia ai, ae a’afia uma ai ma le si’osi’omaga ma le foafoaga atoa. O le fesili o lo o fia tulituliloaina e lenei mataupu, “**e uiga lea i le Talalelei ma mea uma o le foafoaga, ua a’afia ma taotaomia lo latou sa’olotoga, ina ua sauāina.**” O le fa’amoemoe maualuga ma le finagalo paia o le Atua- ia ola mafuta le Atua ma lana tagata na fai, fa’atasi ai ma lana foafoaga atoa, i se mafutaga e pa’ia ma atoatoa ona lelei. Peita’i, ona o le agasala ma le ola fia tuto’atasi o le tagata e aunoa ma le Atua, ua motusia ai lea mafutaga, ma ua saisaitia ma taotaomia ai le sa’olotoga o le tagata.

SAUĀINA: O le fesili e tula’i mai- O le ā le feso’ota’iga o le Talalelei ma le sauāina o tagata ma le foafoaga atoa? E mafai fo’i ona fa’apea,- **O le ā le galuega a le Talalelei mo e ua sauāina?** (What is the Gospel in the midst of oppression?) E a’o pea lava ina manatua, e tele itu e ta’ua ma fa’auigaina ai le sauāina o le tagata.

1. **Sauāina i le tino-** (physical oppression). O tagata ia o lo'o taotaomia o latou aiā tatau ma lo latou sa'olotoga i le tino. O tamaiti ua lē avea i ni a'oga, ae ua fa'afaigaluega ina ia su'e mai ai le tamāoaiga o isi. O tinā ma tamaita'i ua saisaitia lo latou sa'olotoga ona o tu ma agaifanua a atunu'u o lo'o latou aumau ai. O tagata ua taofia fa'amalosi i falepuipui ona o ō latou talitonuga.
2. **Sauāina o le mafaufau-** (mental oppression). O tagata o lo'o fa'apologaina o latou mafaufau ona o le pule sauā ma le pule so'ona fai a nisi tagata. O tagata ua lē mafai ona fa'asoa atu o latou talitonuga ona ua fa'amata'uina e isi. O tagata ua lē mafai ona ta'u atu le mea moni ona o le fefe ma le atuatuvaile.
3. **Sauāina i manatu ma lagona-** (emotional oppression). O tagata o lo'o maua i lenei sauāina, e tele lava i totonu o le lotoifale o le aiga, i le va o le tamā ma le tinā, ua lē mafai ona fetufaa'i ma fefa'asoa'i i ni o lāua lava fa'afitauli. O le va o matua ma fanau, ina ua lē amana'ia e matua leo o fanau, ae fa'apea fo'i le iloa e fanau o lo latou va ma matua. Ae le gata i lea, o le sauāina lea e mafai ai ona toe fasia lava le tagata ia i ona lava taofia ma ona lagona.
4. **Sauāina fa'ale-agaga-** (spiritual oppression and bondage). O le sauāina lea o le loto ma le agaga o le tagata i lona va feagai ai ma le Atua. E lē fa'apea ua sauāina e le Atua le tagata, leai, a o le tagata ua alu 'ese mai le Atua ma lona finagalo, ua faia lona lava loto, ona lagona ai lea e le tagata lona mafatia ma le sauāina fa'ale-agaga.

VA'AIGA FA'ALE-TUSI PAIA. O le fetalaiga a Iesu, "Ua ou sau ina ia latou maua le ola ma maua atili ai lava." O le Talalelei lea,-- ina ia maua e le tagata le 'ola manuia' ma le 'ola sa'oloto **'atili ai lava,'** i o tatou olaga atoatoa- i le tino, mafaufau, manatu ma lagona, fa'atasi ai ma le ola i lā le agaga. O le Talalelei o lo'o aumaia le sa'olotoga mo le tagata ma le fofoaga atoa ua sauāina.

O le agaga o lo'o fia fa'amamafaina e lenei pepa, O le Talalelei iā Iesu Keriso, o le Talalelei i le SA'OLOTOGA. I totonu o lenei lalolagi o fa'afitauli, o lo'o sauāina le tagata vaivai e le tagata malosia, o lo'o sauāina fo'i le tagata maulalo e le tagata maua luga. O le feau o le Talalelei: ua afio mai Iesu ina ia, "**tatou maua le ola, ma maua atili ai lava.**" (Life in all its fullness).

FA'ATINOGA O LE MATAUPU:

1. Fai se felafolafoa'iga lautele a le Autalavou i lenei mataupu i ona itu ua mautinoa ai le sauāina o le tagata ma le fofoaga atoa.
2. Ia a'afia i le felafolafoa'iga se su'esu'ega i le Tusi Paia, e fa'atatau i le fetalaiga a Iesu- "**Ua ou sau ina ia latou maua le ola, ia maua atili ai lava.**" O le ā le uiga o le,-- **'ia maua atili ai lava?'**
3. Saunia e lau Susuga i le ta'ita'i se saunoaga e ta aofa'i ai manatu ma lagona uma na fa'aalia e le Autalavou.

Toe manatu: O le tatalo a le tagata sa'oloto i le Atua, e lē o le ave'eseina o le sauāga mai le lalolagi, a ia tatou maua le sa'olotoga mai le Atua, e ala i le fa'aolataga a Iesu Keriso, ina ia tatou manumalo ai mai le sauāina. (It is not to remove oppression from the world, but

rather to give us the freedom to overcome oppression). Ia a'oa'oina tupulaga talavou,-- O le Talalelei o le Sa'olotoga, e afua mai le Atua e ala iā Iesu Keriso, o le Talalelei lava lea e fa'asa'olotoina ai i tatou uma mai le ola sauāina.

Manuia le felafolafoa'iga.

.....

SETEMA 08, 2019. SU'ESU'EGA I LE TUSI PAIA.

MATAUPU: SA'OLOTOGA FA'AKERISIANO.

TUSI FAITAU- Kalatia 3: 27-29.

Fesoasoani mo le Mataupu:

1. **KALATIA:** O ulua'i malaga fa'amisionare a le Aposetolo o Paulo, sa ia asiasi atu i Asia Itiiti i le tala'iina o le Talalelei e fa'apea, "o le fa'aolaina o le tagata, e maua lea i le fa'atuatua iā Iesu Keriso." (Salvation is by faith in Christ alone). Sa to'atele tagata sa taliaina lea Talalelei ma ua liliuina ma fa'aolaina ai, ma o tagata lava ia sa latou fa'avaeina ma atia'e nisi o lotu fou i totonu lava o le itumalo o Kalatia. O lona uiga, o lenei tusi iā Kalatia, e lē o fa'apitoa mo se aulotu po o se ekalesia e tasi, ae ua fa'atatau mo le itumalo o Kalatia atoa. I le tele o manatu o le 'au su'esu'e i le Tusi Paia, o tagata o Kalatia, o taga e femoumoua'i ma lē tumau. (restless). O tagata fa'atupu vevesi i o latou uiga fulufululele (warlike). Ae le gata i lea, o ni tagata e lē mautonu ma fesuisuia'i i o latou manatu ma lagona (changeable). O le ala lea ina ua tu'ua e le Aposetolo o Paulo Kalatia, ina ua tupu ma ola le Ekalesia Kerisiano, ae taunu'u atu loa i totonu o Kalatia, tagata Iutaia mai Ierusalem ma le tala'iga fou ma le sesē, ma ua fa'atupuina ai le vevesi-**Po o fea ea le Talalelei moni?** O le tala'iga fou ma le sesē sa tala'iina e tagata Iutaia nei, ua latou fa'apea mai, o le fa'aolaina o le tagata, e lē atoa i le na o le fa'atuatua iā Iesu Keriso, ae o le fa'atuatua iā Iesu, ma le taofi mau ma le usiusita'i i le tulafono 'fa'a-Iutaia. (the false teachers proclaimed that, salvation is faith in Christ plus keeping the Law). O lona uiga, ua tu'ufa'atasia e nei tagata Iutaia, le fa'atuatuga fa'a-kerisiano ma le tapua'iga fa'a-Iutaia (Christianity and Judaism), le alofa tunoa ma le Tulafono (Grace and Law), atoa ai ma Keriso ma Mose (Christ and Moses). Ae le gata i lea, o nei tagata Iutaia, sa latou taumafai e fa'aleaga ma fa'aleaogā le galuega tala'i a le Aposetolo o Paulo, ina ua latou fesiligia le tulaga fa'a-Aposetolo o Paulo. Sa latou taumafai fo'i e fa'aleaogāina le feau i le fa'aleagaina o le 'ave feau. (they tried to undermine the message by undermining the messenger). Sa to'atele le 'au fa'atuatua i Kalatia sa a'afia ma fa'asesēina e nei taga Iutaia ma ā latou tala'iga. O le ala lea, ina ua maua e Paulo le tala i le mea ua tula'i mai i Kalatia, na ia tusia ai loa lenei tusi, e fa'alototele iā i latou ina ia latou tumau i le Talalelei iā Iesu Keriso. O le aotelega o lenei tusi, o lo o fa'amamafaina pea e Paulo, le fatu o lana tala'iga o le Talalelei, **o le fa'aolataga e afua mai i le alofa tunoa o le Atua, a e lē o galuega a le tulafono.** (Salvation is by grace alone, not by works of the Law). I le manatu o Paulo, o galuega lelei e fa'atinoina e le tagata mo le Atua, o fua

fa'aaliali lava ia o le fa'aolataga (good works are not a condition of salvation, but a fruit of it). Auā mo Paulo ma lona taofi mausalī, “**e ta'uamiotonuina le tagata i lona fa'atuatua.**”

2. UPU UA FIA FA'AMAMAFAINA:

(a). alofa tunoa: O le upu i le gagana Eleni, 'charis,' 'grace.'--- o le alofa le fa'atuāo'ia lea o le Atua ua foa'iina fua mai ma fai meaalofa mai ai le Atua mo le tagata ma le lalolagi atoa. O le alofa i le gagana Eleni e tolu upu o lo'o fa'aaogāina e le Tusi Paia, 'eros'—o le alofa lea i le va o le tane ma lana avā, po o le tamāloa ma le fafine. 'phileo'---o le alofa lea i le li'o fa'ale-aiga, i le va o matua ma fanau, le va o le tuagane ma le tuafafine, ma le va o le uso i le uso. 'agape'--- o le alofa lē fa'atuāo'ia ma le alofa tunoa lea o le Atua. O le alofa tunoa o le Atua, e lē mafai ona sailia pe galueaina (earned) e le tagata e fai mo sona tau, auā o le meaalofa foai'fua mai lea a le Atua, auā o le Atua o le alofa lava ia. O lo'o tusia e le Aposetolo o Paulo iā Tito upu nei: *“A ua fa'aalia mai le agalelei ma le alofa i tagata o lō tatou fa'aola le Atua, ona fa'aola mai ai lea o ia iā i tatou, e lē ona o galuega o i le amiotonu sa tatou faia, a e tusa ma lona lava alofa i le fa'ata'eleina i le toe fuata'iina, ma le fa'afouina e le Agaga Paia, ua na fa'amaligi tele mai i luga iā i tatou, ona o Iesu Keriso lo tatou Fa'aola, ina ia ta'uamiotonuina i latou i lona lava alofa tunoa, ia fai i tatou ma sulī, e tusa ma le fa'amoemoe i le ola e fa'avavau.”* (Tito- 3: 4-7).

(e). fa'atuatua: O le talitonu lea i le tala ua aumai. A ua talitonu temoni i le tala ma latou tetemū i le fefe, a e lē maua ai le ola. O le fa'atuatua e ola ai, e le'i gata i le talitonu i le tala iā Iesu na maliu ma toe soifua mai, a ua tau le tala i le loto, ona fa'alagolago lea i lona maliu e maua ai le ola. O lo'o tusia i le Eperu upu nei: *“A o le fa'atuatua, o le fa'alagolago lea i mea ua fa'amoemoe i ai, o le mautinoa lea o mea e lē o va'aia.”* (Eperu- 11: 1).

(i). ta'uamiotonuina: O le upu i le gagana Eleni, 'diakaioo,' 'to justify'. O le upu sa fa'aaogāina i le tagata ua fa'amasinoina i le tulafono, ae leai sana mea na fai, ua tu'ua'ifuaina, ona ta'uamiotonuina ai lea o ia e le fa'amasino. A e 'ese le fa'amasinoga tonu a le Atua,-- e ta'uamiotonuina ai i tatou ona o le amiotonu a Iesu. E lē ona o sa tatou amio ua sa'o pe tonu, e lē ona o so tatou lava lelei, po o so tatou 'ana'ana, a o le alofa fua ma le alofa tunoa o le Atua e ala iā Iesu Keriso.

(o). tulafono: E fa (4) ni uiga ua fia fa'aalia e mafai ona fesoasoani ai i le mataupu.

* O tulafono e sefulu na tu'uina e le Atua iā Mose, ina ia avea ma fa'avae e atina'eina ai lona nu'u filifilia, ina ia latou ola e tusa ma le finagalo o le Atua ua tu'uina mai. Sa tusia ia tulafono i luga o papa ma'a.

* O le upu i le gagana Eperu o le Torah, 'tulafono,' O le fa'aigoaina lea o ulua'i tusi e lima o le feagaiga tuai o le Pentateuch.

* I le va'aiga a le Evagalia a Ioane, o le tulafono, o le feagaiga tuai atoa lea.

* O le upu Eleni, ‘nomos’- Law- o lona uiga, o le finagalo pa’ia o le Atua ua avea ma tulafono, ia tausia e le tagata e ala i lona tino, mafaufau, manatu aemaise fo’i i lona loto ma le agaga. O le manatu fa’a-Iutaia, o le tausiga fa’amaoni o le tulafono, o le fa’aaliga va’aia lea o lo latou fa’atuatua mausalī i le Atua. Peita’i, o le afio mai o Iesu Keriso, ua fa’aatoatoaina iā te IA le Tulafono. O le fetalaiga a Iesu: ua atoa le tulafono i le alofa, ***“Ia e alofa atu i le Ali’i lou Atua, ma lou loto atoa, ma lou agaga atoa, ma lou manatu atoa. E te alofa atu fo’i i lē lua te tuaoi, ia pei o oe lava iā te oe.”***O na poloa’iga e lua, e autu ai le tulafono uma ma le ‘au perofeta. (Mataio- 22: 35-40).

3. SA’OLOTOGA:

O nai fesili o lo’o taumafai lenei mataupu e fa’aali mai.

- O le a le sa’olotoga Fa’a-kerisiano?
- O i ai ea ni tuāo’i (boundaries) o le sa’olotoga fa’a-kerisiano?
- O fea e maua mai ai le sa’olotoga fa’a-kerisiano?

O le sa’olotoga fa’a-kerisiano, po o le sa’olotoga moni o tagata kerisiano, e maua iā Keriso. O le sa’olotoga e maua iā Keriso, o le mafutaga lea a le tagata ma le Atua e malie ai mana’o lelei uma o le tagata, ma tumau ai pea ma le saogalemu i le mafutaga ma le Atua. O le sa’olotoga fa’a-Kerisiano, e leai ni ona pa tuāo’i, se’i vagana lava le Atua ma lona finagalo. O le agaga maualuga o le Atua talu le amataga o lana foafoaga pa’ia, ia ola sa’oloto le tagata, O le sa’olotoga lea e fai ai mea lelei ma mea silisili ona lelei mo le Atua ma le foafoaga atoa. E sa’oloto fa’amaoni le tagata iā Iesu Keriso, auā ua na o Iesu na te mafai ona fa’asa’olotoina le tagata mai le agasala ua faigata ona manumalo ai le tagata, fa’atasi ai ma noanoataga o lo’o saisaitia ma taotaomia ai le tagata i lenei lalolagi o fa’afitauli. O le agaga lea ma le feau tau momoli a le Aposetolo i le Ekalesia ma le ‘au fa’atuatua i Kalatia. Ua latou maua le sa’olotoga fa’a-Kerisiano, ***‘aua ua tasi lava outou uma iā Keriso’***E lē o le tausiga o le tulafono fa’a-lutaia, e lē ona o sa latou amio ua lelei po o se latou amio ua tonu, a ua sa’oloto i latou ona ua ta’uamionuina i latou i lo latou fa’atuatua iā Iesu Keriso. O le ala lea ina ua tasi i latou, ua latou ola sa’oloto, ‘ua lē o i ai se Iutaia po o se Eleni, e lē o i ai se pologa po o se sa’oloto, e lē o i ai se tane po o se fafine. O le sa’olotoga fa’a-Kerisiano, ua mafai ai ona tasi i latou uma i le mafutaga ma le Atua, ma ola fa’atasi ma mafuta ma le lalolagi atoa. O le agaga o le sa’olotoga fa’a-Kerisiano, **A fia ola sa’oloto moni ma fa’amaoni le tagata i le tino, mafaufau, ma le agaga, o le alafua ua uma ona fa’ata’oto mai e le Tusi Paia, o le ola mafuta lea i le Atua, ma faia lona finagalo i le olaga nei.**

Manuia le su’esu’ega i lenei Aso Sā.

////////////////////////////////////

SETEMA 15, 2019. "FA'ATALATALANOAGA."

MATAUPU: "FESILI MA TALI O LE TALALELEI."

FA'ATOMUAGA:

Talu ai ona o lenei masina o se masina tāua tele i le tatou Ekalesia, ona o le fa'amanatuina o le o'o mai o le Talalelei i Samoa, o lea ua manatu ai e tu'uina atu lenei mataupu e fai ma fa'amanatu ma fafagu mo tupulaga talavou, ina ia mausalī ma tumau pea lo latou manatuaina o le talafa'asolopito o le o'o mai o le Talalelei i Samoa. Ae le gata i lea, o se talatalanoaga e fa'amausalī atili ai pea i o latou loto mea moni na tutupu iā Samoa, i le alofa tunoa o le Atua mo ona tagata i le lalolagi, e ala i lana Talalelei o le fa'aolataga.

FESILI MA TALI.

1. O ai Nafanua?

Tali: O le atua fafine po o le perofeta tamaita'i Samoa, na gasolo i ai tupu o Samoa mo sailiga manuia i aso anamua, ona e moni ana valoaga.

2. O ai le igoa o le Malietoa lea na malaga iā Nafanua, e saili i ai sona matu'upalapala? (manuia). **Tali:** O Malietoa Fitisemanu.

3. O ai na aumaia le Talalelei i Samoa? **Tali:** O Ioane Viliamu ma Papu. (Barff)

4. O le ā le tausaga na taunu'u mai ai le Talalelei i Samoa? O fea o Samoa na taunu'u i ai misionare na aumaia le Talalelei? **Tali:** (i). 1830. (ii). Sapapali'i Savai'i.

5. O fea le atunu'u na omai ai misionare na aumaia le Talalelei i Samoa? O le ā le igoa o le fa'alapotopotoga fa'amisionare e ana misionare ia na omai i Samoa ma le Talalelei?

Tali: (i). O Peretania. (ii). L.M.S. (London Missionary Society).

6. O ai na taliaina le taunu'u mai o misionare ma le Talalelei? **Tali:** O Malietoa Vainu'upo.

7. O ai le ulugali'i Samoa lea na faimalaga fa'atasi mai ma misionare na latou aumaia le Talalelei i Samoa? O fea so la nu'u i Samoa? **Tali:** (i). O Fauea ma Puaseisei. (ii). O Sapapali'i.

8. O ai na saunia le tatalo o meaa'i ina ua afe le va'alotu i Safune i Savai'i mo se malologa?

Tali: O Puaseisei.

9. O fea le motu ma le atunu'u na maliu fasia ai Ioane Viliamu? **Tali:** O Eromaga i le Niu Eperiti po'o Vanuatu.

10. O fea le atunu'u na fausia ai e Ioane Viliamu lona va'a na latou faimalaga mai ai i Samoa?

Tali: Tahiti.

11. O le a le igoa na fa'aigoa ai lea va'alotu? **Tali:** O le Savali o le Filemu. (Messenger of Peace).

TALI MAI I LE SA'O PO O LE SESĒ.

1. E taunu'u mai le Talalelei i Samoa o soifua pea Samoa i tu ma aga fa'apaupau? **Tali:** Sa'o.
2. Na amata galulue misionare e tala'i le talalelei i tagata Samoa i le motu o Tutuila? **Tali:** Sesē.
3. 'Sau ia inā e alu ma i'u o malo, ae fa'atali i le lagi se ao o lou malo. O upu ia a Nafanua na fai atu ai iā Malietoa. **Tali:** Sa'o.
4. E to'atele tagata Samoa na ofo atu o latou ola, e avea ai ma misionare e tala'i le Talalelei i isi motu o le Pasefika? **Tali:** Sa'o.
5. O le galuega o le fa'aliliuina o le Tusi Paia i le gagana Samoa, sa faia lea i Tamaligi i Apia. **Tali:** Sesē.
6. Sa fa'aliliuina le Tusi Paia i le gagana Samoa e nisi o misionare papalagi ma nisi o tamā o Samoa. **Tali:** Sa'o.
7. Na fa'aigoa e misionare na aumaia le Talalelei i Samoa le tatou Ekalesia o le E. F. K. A. S. **Tali:** Sesā.
8. O le galuega o le fa'aliliuina o le Tusi Paia i le gagana Samoa, sa ta'ita'iina pea e le mana o le Agaga Paia. **Tali:** Sa'o.

FA'ATINOGA O LE MATAUPU.

- Fa'aiiloa i le Autalavou le mataupu o le a feagai ai i lenei Aso Sā.
- Fua e le ta'ita'i le vaevaega o le Autalavou i vaega i le aofa'i o le Autalavou.
- Fa'amaumau e se failautusi tofia togi ua maua e vaega ta'itasi. O lo'o i le ta'ita'i le aofa'i o togi mo fesili ta'itasi.
- E mafai ona tali gutu vaega ta'itasi i le fa'asologa o fesili, e mafai fo'i ona tusia e se failautusi o vaega ta'itasi a latou tali pe afai e galulue i vaega.
- **E talosagaina le matua fa'alautele ma fa'amalamalama lelei e lau Susuga tali o fesili, e fa'atalatalanoa ai le mataupu, a'o fa'amaumau e le Autalavou i ā latou api, ina ia le toe galo.**
- Fa'aiu le mataupu i se pese o le talalelei mai le tatou Tusi Pese, e pei o lea, #259.
- Fa'aiu e se sui o ali'i o le Autalavou le mataupu i se tatalo.

Manuia le fa'atalatalanoaga.

////////////////////////////////////

SETEMA 22, 2019. FA'AFINAUGA/DEBATE.

MATAUPU: "E TEUTEU E LE TALALELEI LE AGANU'U."

FA'ATINOGA O LE FINAUGA.

- Ia vaelua le Autalavou i ni vaega se lua, o le vaega muamua, e lagolagoina le autū o le finauga, a o le vaega lona lua, e tete'e i le autū o le finauga.
- Ia tofi e le vaega ni o latou sui se to'afa mo le finauga.
- Ia tu'u atu le 20 minute mo vaega ta'itasi e fa'a-sauni ai mo le finauga.
- Ia ta'i lua minute a le sui e saunoa ai, vagana ua fa'atagaina e le fa'amasino se taimi fa'aopoopo. (tasi le minute).
- Ia tofi se fa'amasino fa'apitoa e pulea ma fa'amasinoina le finauga.
- E ta'i lua togi e maua pe a saunia lelei se sui o so'o se itu i le finauga.
- Ia faia le finauga mo le 30 minute.
- Ia tolaulau e le fa'amasino togi o le finauga ma fa'amasino mea e vaivai ma malosi ai itu ta'itasi.
- Ia fa'ai'u le finauga i se saunoaga a lau Susuga i le Fa'afeagaiga, i le tāua o le mataupu o le finauga, ae maise o nisi o manatu sa fa'aalia i le finauga e tāua, ma nisi fo'i o manatu e tatau ona ave i ai se fesoasoani, ma tualuga ai loa le masina tāua o le fa'amanatuina o le o'o mai o le talalelei i Samoa.

FESOASOANI MO LE MATAUPU.

E taunu'u mai le Talalelei i Samoa o lo'o fetaua'i Samoa. O lo'o i ai fo'i tu ma amio fa'anuu'upo e pei o poula o lo'o fa'atinoina e tagata Samoa. E taunu'u mai fo'i le Talalelei, o lo'o i ai atua o tagata Samoa o lo o tapua'i i ai. E tofu lava le tagata ia ma lona atua e tapua'i i ai. Sa taunu'u mai le Talalelei ma iloa ai amioga a tagata Samoa e tatau ona sui. Ia tu'u aga fa'anuu'upo e pei o poula ma le tele o avā, ia tu'u le fasioti tagata ma le si'i taua o le tasi nu'u i le tasi nu'u. Ia iloa e tagata, e to'atasi lava le Atua e tapua'i i ai. E na o le Atua o le Talalelei. O le Atua le Tamā, le Alo ma le Agaga Pa'ia.

Na a'oa'oina fo'i e le Talalelei le alofa fa'ale-Atua ua atoatoa i ai le Tulafono na fa'aalia i le Atua liutino tagata iā Iesu Keriso lona Alo pele e to'atasi. E ufiufi e le alofa le leaga o le isi i le tasi. E tausia fo'i e le alofa fa'ale-Atua ua fa'aali tino mai iā Iesu Keriso le va lelei ma le nonofo lelei o le tasi tagata ma le isi. Ua fa'atuina fo'i e le Talalelei le tāua o le ola tapua'i i le Atua. Ua fai falesā ma tu'u i ai Faifeau e va'aia aulotu ma nu'u, e le gata i tapua'iga i le Atua, a o le ola fa'ale-agaga fo'i o tagata. O le mea moni e leai lava se nu'u e lē o iai se falesā. Ua maitauina fo'i le tāua o le Talalelei i lotu afiafi i aiga, saofa'i a matai, alalafaga i failele ma ma'i, lotu fa'amavae, a'oga fa'ale-Tusi Paia mo fanau, fa'apa'iaina o fale ma maota e nonofo ai, lotu i le Aso Sa fa'apea le olaga i aso uma, ma isi aogā e tele o le o'o mai o le Talalelei i Samoa.

O nisi o tāua o le o'o mai o le Talalelei i Samoa, o le tusiaina lea o le ta gagana i mata'itusi. O ulua'i a'oga i Samoa, o a'oga ia sa faia e 'avefeau o le Talalelei. E lē gata i a'oga fa'ale-Tusi Paia, a'o a'oga fo'i fa'ale-poto salalau. Sa matuā iloga le tāua o le Talalelei i le fa'ae'e o le matu'upalapala o le 'Susuga,' e Malietoa Vainu'upo i auuuna a le Atua o le Talalelei. Ua ia fa'apea fo'i, e lē toe i ai se tupu i Samoa, ae na o le to'atasi lava le tupu- o le Atua lea o le Talalelei.

E ma'eu le matagofie o a'afiaga o le o'o mai o le Talalelei i Samoa. Ua o'o lava i le fa'avae o le malo o Samoa ua autu i upu- "Fa'avae i le Atua Samoa" ma le "Samoa muamua le Atua." Ua nofo lelei le va o nu'u. Ua utu le toto masa'a. Ua fa'amatagofieina atili e le toto pa'ia o Keriso le Ifoga fa'a-samoa. Ua teuteu atili le tu fa'aaloalo a Samoa i le va o fanau ma matua, le va o le tautua ma lona matai, le pulega a le nu'u ma ona tagata, fa'apea fa'asalaga fa'a-Samoa i e ua nofo sala i le nu'u.

E fa'apea fo'i i le fa'amolemole o le tasi i le isi, o se mea taua auā ua a'oa'o mai ai fo'i Keriso. Ua fa'asaga tonu le ola tapua'i i atua e tele, i le Atua moni e to'atasi o le Talalelei. Ua lagona tino le sesē o le tino ma ona tu'inaanau, auā ua tusia e le Agaga Paia o le Atua o le Talalelei i le loto, ana Tulafono ma ana poloa'iga ma fa'amasinoga. O le ita, mata'ua, losilosile vale, onā-aga, matape'ape'a, tu'inaanau, mata'aitu, ma isi uiga o le amio a le tagata sa masani ai, ua teuteu uma ma fa'asāina e le Talalelei. Ioe, na teuteu, ma o lo'o teuteu pea, ma e fa'auau pea ona teuteuina e le Talalelei la tatou aganu'u.

AGANU'U.

O le aganu'u, o le tu ma le aga, ma le amio na ola a'e ma le tagata i se si'osi'omaga fa'apitoa. E i ai mea e lelei ai, ae lē 'asa fo'i ma ona vaivaiga. E taga tasi uma tagata i le amio e tasi i lagona leaga o le tino, ua ta'ua e le Tusi Paia, "o galuega a le tino." E tofu le atunu'u ma lana tu ma agaifanua i le va nonofo ai o tagata, ma lona ola fa'ale-agaga. E mafua uma le ola fa'ale-agaga o tagata o atunu'u ae le'i o'o mai le Talalelei, i le ifo ma tapu'i i tupua ma mea e fiafia i ai. Latou te fa'atino lo latou ola tapua'i fa'atasi, ma le fa'amalosia i ā latou tapua'iga o galuega a le tino, e pei o le fa'ita'aga ma poula, O lona uiga, e lē gata ua teuteu e le Talalelei le aganu'u, o le tu lea ma le agaifanua i le va nonofo ai o tagata, ae ua o fa'atasi lava ma le teuteuina o le amio a le tino ma ona tu'inaanau sa lē mafai ona iloa e tagata o Samoa ma le lalolagi uma, pe leaga i le olaga, ma fa'asāina e le Atua.

Ia manuia le finauga.

////////////////////////////////////

SETEMA 29, 2019 – OKETOPA 20, 2019. – TAPENAGA MA LE MALOLOGA MO LE LOTU TAMAITI.

OKETOPA 27, 2019. AGANU'U.

MATAUPU: "O A NI VAEGA O LE AGANU'U A SAMOA UA VA'AIA AI SUIGA FOU I NEI ASO?"

SINI E FIA TULILOAINA: Ia fetufaa'i ina ia malamalama le Autalavou i nisi o suiga fou ua i le tatou aganu'u. Ae aisea fo'i ua mafua ai?

UPU TOMUA: E i ai le manatu o se mea lelei le fa'atalatalanoa o lenei mataupu taua i le Autalavou se'i vasa'i ai le pisi sa feagai ai ma le lotu a tamaiti, ae maise o se toe fagufagu i

mafaufau augatatā o tupulaga, auā ua umi fo'i si malologa sa feagai ai. O le fa'amoemoe tāua lava, ia toe fafagu i tupulaga ina ia malamalama ma iloa nisi o suiga ua i ai i le tatou aganu'u, ae maise o nisi o mafua'aga o ia suiga. Ae le gata i lea, ia maua fo'i le avanoa e fa'asoa ai i latou i o latou manatu ma lagona, po o sa'o, ae po o talafeagai ia suiga i lenei vaitau ua tatou i ai. O le upu moni lava, a tatou va'ava'ai atu i le fa'atinoga o le tatou aganu'u i vaega 'ese'ese o le soifuaga fa'a-Samoa i nei aso, ua i ai lava suiga ua maitauina. E tele lava vaega ua fia aumai mo le fetufaa'iga a le Autalavou, peita'i, e lelei ona tatou amata i nai vaega faigofie ia. E mafai lava ona fa'atele e lau Susuga, pe a tusa ai ma lou finagalo.

1. FA'AALOLOGA FA'ASAMOA I FAALAVELAVE. (maliu, fa'aulufalega ma umusaga, fa'aipoipoga, saofa'i, ma isi....)

A tatou va'ava'ai i le fa'atinoga o ia vaega o le aganu'u i o tatou nu'u ma alalafaga, e i ai 'ese'esega mai isi fo'i nu'u o le atunu'u. E lelei ona fa'ailoa mai e le Autalavou ni suiga ua latou maitauina, ma fa'ailoa atu fo'i e lau Susuga ni suiga o le a lē maua mai e tupulaga, ona fa'apenā lava lea ona fetufaa'i ai ma fa'aauau ai fa'apenā. Ia tu'u fo'i se avanoa i e matutua po ua matai o i ai i le Autalavou, e fesoasoani ane ai i le mataupu, ia malamalama ma fialia ai le tupulaga i lo latou fa'asinomaga.

2. TAUMAFATAGA A SE AIGA SAMOA.

O le isi fo'i lea itu o le aganu'u, ua tatou iloa ai le tele o suiga ua i ai. O le tele o aiga ua saofafa'i i nofoa ma a'ai i luga o laulau ai. Ua a'ai fa'atasi fo'i matua ma fanau i le taimi e tasi. Ae i le amataga, sa faifeau fanau a'o a'ai matua. E sauni le apa fafano ma nonofo lelei i lalo e fa'afesaga'i ma matua. Sa fa'aaogāina fo'i laulau Samoa e ave ai taumafa, sa iloa lelei fo'i le itu o le laulau e pito i le tagata. E tele fo'i nisi suiga o le a fa'ailoa ane e le Autalavou ma fa'aauau ai pea le fa'atalatalanoaina o le mataupu.

3. GAGANA.

Ua i ai foi' suiga i nisi o vaega o le gagana a Samoa. O le gagana fa'aloalo e fa'aaogā i taimi sa'o ma tataui ai, ua tau lē toe fa'aogāina. E mafai fo'i ona su'esu'e i nisi vaega o le gagana a Samoa ua i ai suiga. Ia fetufaa'i ma fa'asoa manatu i suiga o le ā fa'ailoa mai e le Autalavou.

E talosagaina fo'i lau Susuga i le ta'ita'i, ina ia sailiili i nisi nei o vaega o le tatou aganu'u, ua va'aia ai nisi suiga, e pei o vaega ua tā'ua i luga. E lelei pea le silasila ane i nai aganu'u ia ma suiga ua i ai pe afai e lava se taimi o le a tou fetufaa'i ai.

***** Ta'aloga. *** Fa'afiafiaga.**

FA'ATINOGA O LE MATAUPU.

1. Fa'amalamalama e le ta'ita'i le uiga moni o le mataupu.
2. Ia fa'asolosolo ona fa'aali lagona ma manatu o sui ta'itasi, i nisi o vaega o le tatou aganu'u ua va'aia ai suiga, e pei ona tā'ua i luga.
3. E fautuaina fo'i le talia o ni fesoasoani mai nisi sui, fa'atatau i manatu ua fa'aalia e nisi.

4. E fautuaina ia matuā silasila toto'a i le t̄aua o suiga, ma le t̄aua o le tatou aganu'u, ia maua ai se a'oa'oga t̄aua mo tupulaga talavou.
5. Ia tauluga i se saunoaga fa'ai'u a lau Susuga i le Faifeau, le fa'atalanoaina o le mataupu i sona aotelega mo le Autalavou.
6. Filifili lelei e lau Susuga a le ta'ita'i se pese o le Tusi Pese e fa'ai'u ai le mataupu.
7. Saunia e se sui o le Autalavou i se tatalo fa'ai'u.

Manuia le fetufaa'iga.

////////////////////////////////////

NOVEMA 03, 2019. SU'ESU'EGA I LE TUSI PAIA.

MATAUPU: "TALITONUGA MAUTŪ O LE FA'ATUATUAGA FA'A-KERISIANO."

LU'ITAU TAUA O LE MATAUPU:

"IA TOE FA'AMANATU I LE AUTALAVOU LE T̄AUO O A'OA'OGA UA SU'ESU'E I AI. IA FA'AMASALĪ ATILI AI PEA LO LATOU SOIFUA MA LE OLA FA'ATUATUA I LE ATUA, MA TALITONU ATOATO A I LE EKALLESIA PAIA A LE ALI'I I LE LALOLAGI."

1. O le Atua Tolu Tasi Paia. O le Atua le Tamā, le Alo, ma le Atua le Agaga Pa'ia. E tolu Peresona, ae to'atasi lava le Atua.
2. E to'atasi le Atua Silisili-'ese. O le Atua na faia le lagi ma le lalolagi.
3. O Iesu Keriso o le Alo Pele e to'atasi o le Atua. O lo tatou Ali'i ma le Fa'aola. O ia o le Atua liutino tagata.
4. Ua fanau mai Iesu Keriso mai iā Maria le taupou. Na fa'asatauroina Iesu, o lona toto ua fa'amagaloina ai a tatou agasala.
5. Ua toetu mai Iesu i le oti. Ua afio a'e i le lagi. E toe afio ifo o Ia e fa'amasino i e ola atoa ma e ua oti.
6. E mafuta mai pea le Agaga Paia i taimi uma. E tete'e atu i le agasala, ae fa'amalosi i le Ekalesia, o le tino o Keriso i le lalolagi.
7. O tagata uma e agasala e mana'omia le togiola na faia e Iesu Keriso ma le toe fanaufouina i le Agaga Paia. O meaalofo ofoina mai e le Atua, mo i latou o e fa'atuatua iā te Ia.
8. O le Tusi Paia o Afioga Paia a le Atua, ua aofia ai o mea uma mo le fa'aolataga, o le maualuga lea e tatau ai ma lo tatou ola fa'atuatua.
9. O i latou uma o e fa'atuatua i le Atua, e toe fa'atuina mai i latou e fa'atasi ma le Atua i le Ola e Fa'avavau.

FA'ATINOGA O LE MATAUPU.

1. E lelei pe a fa'ailoa i le Autalavou le mataupu o le aso, pe a ma se vaiaso atoa a'o lei' faia le su'esu'ega tu'ufa'atasi lenei, ina ia lava se taimi e sailiili ai i o latou aiga.
2. E lelei pe a o e sailiili ma su'esu'e fa'atasi i vaega e tolu e pei ona fa'ailoa atu i le vaevaeina o le Autalavou.

3. Fa'ailoa i le Autalavou le fa'amoemoe o le mataupu – O le Su'esu'ega i le Tusi Paia.
4. Ia vaevae le Autalavou i vaega e tolu – ia ta'itolu a'oa'oga a le vaega.
5. Ia fa'apotopoto i vaega mo a latou fetufaa'iga, e ta'itai' e se to'atasi ua latou filifilia. (Ia fuafua e le ta'ita'i se 10 minute.)
6. Ia toe tu'ufa'atasi le Autalavou, ona fa'ailoa mai lea o o latou manatu mo le fetufaa'iga tu'ufa'atasi.
7. E fa'ai'u lava i se saunoaga a lau Susuga e afifi atoa ai le mataupu ia mausalī i loto ma agaga o tupulaga.
8. Usu se pese mai le Tusi Pese e fa'ai'u ai le mataupu, e lelei pe a silssila ane i pese o lo o i le vaega o le 'Ola Fa'ale-agaga.'
9. Fa'ai'u i se tatalo e se ali'i o le Autalavou.

MANUIA LE SU'ESU'EGA.

////////////////////////////////////

NOVEMA 10, 2019. SU'ESU'EGA I LE TUSI PAIA.

MATAUPU: "O LE PESE O VI'IGA A MARIA."

TUSI FAITAU: LUKA – 1: 50 – 53.

MANATU FA'AMAMAFAINA: "O LE FELIUA'IGA O TULAGA MA MAFAUFAUGA."

SINA FESOASOANI MO LAU SUSUGA:

1. Luka – 1: 46 – 55.

O le vaega atoa lea o le tusi ua fa'amauiina ai le pese o vi'iga a Maria i le Atua, fa'atatau i le meaalofa a le Atua mo le lalolagi, e ala mai iā Maria. Sa talia ma malamalama lelei fo'i Maria i lea meaalofa mo ia. Ua ia sauni fo'i e talia ma le loto maulalo e tu'uina atu le tama (Iesu) e auauna mo le vi'iga o le Atua. Talu ai ona o le agaga o le pese, o le fa'ailoa atu o le vi'iga ma le loto fa'afetai i le Atua, o le ala lea na avea ai lenei pese o vi'iga ma fatuga lauiloa sa fa'aaogāina lautele e le ulua'i Ekalesia i aso ua leva. Afai sa vivi'i Maria i le Atua ona o le feau na fa'ailoa i ai e le agelu o Kaperielu, e uiga i le Mesia o le a fanau mai iā te ia, o se agaga fo'i lea na fa'aosofia ai Kerisiano uma e pepese i lenei pese. E tatau fo'i ona tatou pepese ai i lea vi'iga, auā o le Mesia lava na te aumaia le fa'aolataga mo tagata uma. I totonu lava la o lenei pese o vi'iga a Maria, e tele ta'iala ma feau tāua o lo'o a'oa'o mai ai lagona o le taupou, mo Kerisiano uma lava. O se tasi o ia ta'iala tāua, po o se fe'au aogā, e aga'i i ai le mataupu i lenei Aso Sa, ua fa'aigoaina – "O le feliu'iga' o tulaga ma mafaufauga."

2. Luka – 1: 50 -53.

I lenei pese ta'uta'ua o vi'iga a Maria, ua tatou iloa ai, pe afai e afio mai le Mesia, o le a fa'ataunu'uina ai le feliu'ina po o le suia o tulaga ma mafaufauga i le olaga maulalo o soifua ai tagata. O le a feliu'i ai le tau'aloa i le lē amanaiaina. O le ā matuā suia e le Atua le tulaga o mea. O le a liliuina e le Atua mea uma e ala i le feliu'i mai o lugā i lalō, o lalō fo'i i lugā. Ua fa'ailoa mai ai e Maria, o le a'ao malosi o le Ali'i na te fa'ata'ape'apeina ai o e fa'amaualuluga

i manatu o o latou loto. “E tului ifo e ia o ali’i nai o latou nofoali’i, ae fa’aeaina e ia e fa’amaulalo, ma e matitiva. E le gata fo’i i lea, o e sa fia a’ai o le a fagina e ia i mea lelei e tele, a o e sa mau mea, e fa’amaina ma fo’i fua atu ma le leai o se mea.

A’OA’OGA.

O le fa’amoemoe lea o le Ekalesia a Keriso e pei ona i ai le taumafaiga a le Toefuataina. O le malamalama lea o Kerisiano uma, o le Ekalesia a le Ali’i i le lalolagi, e ao ina ta’ita’iina e le Agaga o le Atua ma le Upu a le Alii. O i’ina e maua ai le fa’afouina o le atamai i tagata o le lalolagi, e saili ai le amiotonu ma le ola atoatoa o finagalo ai le Ali’i i tagata uma. O le galuega fo’i lea ua vala’auina i ai tatou tupulaga talavou o le Ekalesia, ina ia tatou galulue mo le liliuina o tagata, o e lo’o lē iloa pea le amiotonu ma le olaga Kerisiano e tataua ona ola ai. E lē tataua ai ona tatou fifilemu ma fa’afesaga’i pea ma le lē amiotonu lea o lo’o i ai i le olaga le malamalama ma le pogisa. Ua tele tulimanu o le olaga ua tatou va’aia ai le leai o se amiotonu a le Atua o i ai i le olaga o tagata. Fa’ata’ita’iga: (i). O le fa’aailoga lanu. (ii). O le to’atele o le ‘au fia a’ai. (iii). O le leai o se saogalemu o tagata ona o taua. (iv). O le ave fa’amalosi o isi tagata. (v). O le pulea fa’amalosi e atunu’u malolosi o atunu’u vaivai.

O le pese fo’i a Maria, o lo’o fa’aalia ai fo’i le iai pea o le Atua i tagata mafatia ma puapuagatia. E ui fo’i o lo’o malosi pea sauaga ma tigā o amoina e tagata vaivai ma le lē tau’aloga, ae o lo’o saili pea le Atua i lana amiotonu ina ia ola ai tagata uma. O le galuega fo’i lea a Iesu na afio mai ai i le lalolagi, ina ia saili i e o mama’i i le tino, mafaufau ma le agaga, ia fa’aolaina. Ia fa’aola lē ua vaivai, ia si’itia lē ua lē amanaiaina. Ia tauamiotonuina lē sa ola fa’amauluga ma tafili saunoa i le lē amiotonu ma le agasala.

FA’ATINOGA O LE MATAUPU.

1. Ia faitau uma le Autalavou i le pese o vi’iga a Maria i le Tusi Paia – Luka – 1: 46 – 55.
2. Fa’amamafa pea le silasila a le Autalavou i le vaega o le pese ua fa’a-autū i ai le mataupu. (fuaiupu: 50 – 53).
3. Fa’aailoa ma fa’amalamalama i le Autalavou le mataupu ma lona manatu e fia fa’amamafaina. E fa’apu’upu’uina fa’apea: “O le feliiua’iga o tulaga ma mafaufauga”.
4. Fa’amatala e lau Susuga i le ta’ita’i le uiga atoa o le vaega lea o le pese, (ff: 50 – 53), ma lona feso’ota’i mai i le olaga o tagata. Afai fo’i e mafai ona tofu le sui ma le kopi o le fa’amatalaga ua tu’uina atu i le tusi, ua matua lelei tele fo’i.
5. Fetufaa’i i vaega po’o le su’esu’e atoa o le Autalavou i fesili fa’atupu manatu ua tā’ua i lalo.

FESILI FA’ATUPU MANATU.

1. O ai ali’i ia o le ā tu’u i lalo e le Mesia mai o latou nofoali’i pe a tatou fua i o tatou nu’u, le malo, ma le atunu’u.?
2. Ua tupu i lou olaga le feliiua’iga lea e finagalo i ai le Atua? Ua feliiua’i la ou lagona tuai i lagona fou? Manatua le tulafono, aua e te pepelo!!!!!!
3. O le ā se tulaga o i ai lou nu’u i lenei vaitau? O taotaomia pea ea nai tagata matitiva e le ‘au mau mea? Ae a le pulega a matai mo le manuia lautele o le nu’u?

4. O le a sau mea o le ā fai e iloa ai ua e maua le fa'amamafa o le a'oa'oga i lenei Aso Sa?
5. Tualuga le mataupu i se saunoaga a le ta'ita'i e ta aofa'i ai le tāua o manatu fa'aalia, ae maise le fa'amamafa o le mataupu.

TATALO FAAIU, (Tatalo faatasi, pe mulimuli fo'i i le ta'ita'i.)

Le Atua amiotonu e, ua matou talitonu, o oe lava le Atua mo tagata uma. O lau afio fo'i e te amanaia tagata uma, o e malolosi ma e vaivai. Fesoasoani mai lau Afio ina ia toe fa'afouina lo matou ola maulalo i le fa'aeaina, ina ia fai i matou ma malamalama ma masima i le lalolagi puapuagatia. I le suafa o Iesu Keriso ua matou tatalo atu ai. Amene.

Ia mafutaina e le Agaga Paia le su'esu'ega ia manuia.

NOVEMA 17, 2019. MATAUPU E FA'ATALATALANO.

MATAUPU: "O LE 'AVA MALOSI MA FUĀLA'AU FA'ASAINA, MA ONA A'AFIAGA I TUPULAGA TALAVOU."

SINI E FIA FA'AMAMAFAINA: "IA VA'AVA'AI TOTO'A TUPULAGA I A'AFIAGA TUGĀ O LE OLAGA E O'O I AI, I LE FA'AAOGĀINA O IA MEA, AE PE AOGĀ FO'I I LONA OLAGA PE LEAI."

SINA FESOASOANI MO LE MATAUPU:

Talu ai ua tatou aga'i atu fo'i i le vaitau o aso fa'amanatu ma fa'ailogaina e le lalolagi, o lea ua manatu ai se'i toe polili pea ma fa'amanatu i a tatou tupulaga talavou le leaga o a'afiaga o le 'ava malosi ma fuāla'au fa'asaina i o latou olaga, ina ia fa'asaina mai ai i latou. O le upu lava e masani ai, e sili lava le puipuia i lo le togafitia. Ia mafai ai ona latou filifili ma le poto, a'o felanua'i mai fiafiaga e tele o ia aso fa'ailogaina.

(i). O le a le 'ava malosi ma fuāla'au fa'asaina?

E to'atele tagata ua manatu o le 'ava malosi e fa'asino i le pia (beer). E ta'u loa le 'ava malosi, o lona uiga o le beer. Peita'i, e lē na o le beer, e fa'asino i ai lenei mea ua ta'ua o le 'ava malosi. E aofia i le 'ava malosi mea inu uma e onā ai le tagata, o le beer, o fagu malosi, (le ma'oi o tupulaga), e fa'apenā fo'i i uaina 'ese'ese o lo'o iai nei. O mea inu uma lava na e aofia i lalo o le ta'u o "ava malosi."

A e o ā la fuāla'au fa'asaina?

Ua matuā malamalama lelei tagata uma ae maise o tupulaga i mea ua fa'asino i ai fuāla'au fa'asaina. O le la'au o le mariuana, o fuāla'au ua kukaina ma gaosia e tagata mai elemeni e sili atu ona malolosi nai lo'o neura o le tino o le tagata na faia ai e le Atua. Ua fa'aigoaina ia fuāla'au o le aisa, ma isi, e felelei ai ta'i tolu i le fa aso i le vateatea e lē malamalama i le mea o tupu iā te ia. O lo'o fa'atauina le 'ava malosi, ae lē fa'atagaina ona fa'atau pe fa'aaogāina fuāla'au fa'asaina, o lona uiga, e ogaoga atu a'afiaga o fuāla'au fa'asaina nai lo le 'ava malosi. Peita'i, pe fa'atau pe fa'asa, o le i'uga lava o ia mea e lua, o le vave ai ona oti. O le fa'amamafa o le mataupu i lenei aso, ia toe fautuaina ia saga malamalama tupulaga talavou, e matuā a'afia le ola i mea uma e lua, 'ava malosi ma fuāla'au fa'asaina.

(ii). O le ā se finagalo o le Ekalesia e' uiga i ia mea?

O le manatu o le Ekalesia, e lē tatau i so'o se tagata o le Ekalesia ona taumafa pe inu fo'i i se 'ava malosi, po'o se 'ava o'ona. Auā afai e taumafa ma onā ai, ona ave'esea lea o lona mafaufau lelei ma fa'atupu ai ni mea leaga i lona loto, ma ono tula'i mai ai ni fa'afitauli ma ni fa'aletonu sa lē tatau ona aliali mai. E tutusa lava fo'i ma le fa'asā ona tagofia fuāla'au fa'asāina, e fa'avalevatea ai le mafaufau, ia pe i'u lava fo'i ina valea mo'i ai ma fasa loa i le auala. O le mafua'aga lea e lē talia gofie ai e le Ekalesia le tagofia e se tasi o se 'ava malosi po'o fuāla'au fa'asaina, ona e le gata i le tele o fa'afitauli ma matagā e mafua mai le tagofia o ia mea, ae ua avea fo'i ma mafua'aga o le to'atele o tupulaga talavou ua maumau ai lo latou ola, ona o le onanā ma felelei, ma feoa'i i ta'avale i luga o le alatele. Manatua e tāua le ola, auā o le ola a le Atua. Ia fa'aaogā tatau fo'i la mo le Atua.

(iii). O nisi nei o a'afiaga o le 'ava malosi ma fuāla'au fa'asaina.

I le va'aiga lautele, ua tele aiga ua malepelepe ma fa'amativaina ona o le fa'atauina nanā o fuāla'au fa'asāina e le tamā, ae mafiafia atu ai ma le inu 'ava malosi a le tinā. Auā fo'i o mea ia na te fa'atupu le misa ma maseiga i va o ulugali'i, ona i'u ai lea i le tete'a po o le falepuipui, ae mafatia ai le fanau. A e sili atu ona leaga, ona o le a telē se tupe e fa'aalu pe afai o le a matuā fa'atāua lava le 'ava malosi ma fuāla'au fa'asaina i le ola. O tupulaga talavou, o le ā sili ona afaina o latou olaga pe afai o le ā tagofia le 'ava malosi ma fa'ata'ita'i atu ai i fuāla'au fa'asaina, auā o le ā avea ia mea e fai ma fa'alavelave i o latou olaga a'oa'oina, ae maise o latou olaga tutupu a'e ma atina'e mo le lumana'i manuia. Ua maitauina fo'i i lenei vaitau le to'atele o tupulaga ua maliliu ma maumau o latou ola ona o fa'alavelave tutupu i le va o aiga ma le va o tupulaga. Peita'i, afai lava e su'esu'e ma sailiili le mafuaaga na mafua ai, o le tali lava, e mafua mai lava i le ova o le onā ma le lele ua le fia sau i lalo, auā ua valea le mafaufau. Ua mautinoa le lē utuva o fa'alavelave tutupu i le olaga ma fa'afitauli e aliali mai ona o ia lava mea e leai se aogā. Ua i ai le manatu o le ā fa'atāua atu pea e le tatou ofisa nei (OAK), lenei lava mataupu e ala atu i polokalame a Autalavou i tausaga uma. O si taugologolo lava ma si fa'amanatu atu pea i tupulaga talavou, ina ia 'alo'alo mamao mai le tagofia o ia mea. O le mea mautinoa lava mo a tatou tupulaga talavou o teine ma tama, ***O le 'ava malosi ma fuāla'au fa'asaina, e matuā leai lava sona aogā mo oe ma lou lumana'i.***

FAIGA O LE MATAUPU.

1. Fai se felafolafoa'iga lautele i lenei mataupu i ona itu ua mautinoa ai o le 'ava malosi ma fuāla'au fa'asaina, o mea e lē aogā i le olaga atia'e o tupulaga talavou.
2. O le avanoa fo'i lea mo sui o le Autalavou e fa'aali mai ai i luma o le Autalavou ni mea ua fa'aletonu po o ni fa'afitauli ua feagai ma lea talavou, e mafua mai i mea ia ua talanoaina.
3. Ia a'afia i le felafolafoa'iga se su'esu'ega i le Tusi Paia, ma se manatu mai le Tusi Paia, e fa'atatau i lenei mea o le 'ava malosi. Tusi Faitau: Levitiko- 10: 8- 11, Faataoto- 31: 4, Sapakuka- 2: 15, Efeso- 5: 17- 18.
4. Se saunoaga a lau Susuga i le ta'ita'i i le mataupu e fa'auma ai le felafolafoa'iga ma toe fa'amalosi-'au ma fautua ai tupulaga talavou i le lē lelei o ia mea o 'ava malosi

o'ona ma fuāla'au fa'asaina, i o latou olaga. Fa'amalosi i ai ia fiafia mamā i le fa'amanatuina o aso fiafia o lenei tausaga pe a sopo i ai le ola ma le malosai mai le Atua.

5. Fa'ai'u i se tatalo a le tagata matua o i ai i le mafutaga i lea po.

Ia manuia le felafolafoa'iga.

////////////////////////////////////

NOVEMA 24, 2019. AGANU'U.

MATAUPU: "TEPA I TUA MA LE AGAGA FA'AFETAI, VA'AI I LUMA MA LE FA'AMOEMOE."

MANATU E FIA FA'AMAMAFAINA:

"IA TEPA I TUA MA LE AGAGA FA'AFETAI I FA'AVAE NA SAU AI LE OLAGA O LE SAMOA I ASO UA MAVAE, IA FAI MA ALA E MAFAI AI ONA VA'AI I LUMA MA LE FA'AMOEMOE E FA'ATUMAUINA AI LE FA'A-SAMOA."

UPU TOMUA:

E i ai le taofi o le 'au su'esu'e e fa'apea, 'E i ai suiga i aganu'u 'ese'ese o le lalolagi mai lea tupulaga i lea tupulaga." (Culture evolves and adapts from generation to generation).

Peita'i, e iai fo'i ma le isi taofi e uiga i le aganu'u- "e sui lava faiga ae tumau fa'avae." O le agaga maualuga lea o lo'o fia tulituliloaina e lenei mataupu. O le ala fo'i lea ua fa'aulutala ai, "Tepa i tua ma le agaga fa'afetai, va'ai i luma ma le fa'amoemoe."

O le 'auga ma le fa'amoemoe autū, ia mafai ona taofi mau tupulaga ma Autalavou Samoa, e lē gata i totonu lava o Samoa nei, ae maise lava i atunu'u e mamao, i tu ma aga fa'a- Samoa na fa'avaeina mai ai o latou olaga. Ae lē gata i lea ua mautinoa lava fo'i le to'atele o tupulaga Samoa i aso nei, na soifua lava ma ola a'e i le si'osi'omaga o atunu'u e 'ese a latou tu ma aganu'u. O le ala fo'i lea e ui ina 'ese lau'ele'ele na soifua ma ola a'e ai, a ia taumafai pea e fa'asino iā i latou fa'asinomaga na afua atu i o latou matua. Ia iloa ai ona fa'afetai i le Atua ona o lenei atunu'u o Samoa ua fai ma o tatou tofi. Ua maitauina le televave o suiga fou ua o'o mai i totonu o Samoa, ae maise lava i totonu o le lotoifale o Aiga, Nu'u, ma Ekalesia, ma ua ave ai nisi o nei suiga fou ma ala ua tutupu mai ai vevesiga ma fe'ese'esea'iga, ua fai ai ma fa'afitauli ua saili gatā ni fofo, i le va o matua ma fanau, o le va o tuao'i, o matai ma 'au-aiga, fa'apea Faifeau ma aulotu. E tatau ai ona fa'ailo pea ma a'oa'oina tupulaga ma fanau a Samoa ia tumau i fa'avae na fa'afailele ma fofoa atu ai o latou olaga. Ia tepa i tua ma le agaga fa'afetai i le Atua, ina ia mafai ona tumau ma fa'aauau le fa'amoemoe i le lumana'i, e aputiputi lo latou fa'asinomaga mo a taeao.

(i). O le sini muamua o lenei mataupu, o le fa'asino ma a'oa'o tu ma aganu'u mo'omia, o lo'o mafai pea ona fa'atumau, e ui lava ina ua sui ona foliga i totonu ma

fafo o le aiga. O le lagona, a manino itu nei, ona tupu loa lea o le fiafia ma vae oso e fa'ataunu'u.

(ii). Se'i toe tepa tasi ane i le Aiga o ananafi ma fa'atusatusa ane i Aiga o aso nei.

AIGA O ANANAFI.

Sa nonofo, taumamafa, ma galulue fa'atasi. E tasi lona pule po'o le ta'ita'i, o ia lea o le matai /sa'o. O ia lea e maua uma mai ai fa'atonuga o le aiga. E lē te'ena e se tasi lana upu. Sa loto tetele le aiga e puipui a latou mea faitele, sa fai fa'atasi ma'umaga ma sauni fa'atasi taumafa e a'ai fa'atasi ai. O le fa'amamāina o le fanua ma le fausiaina o maota ma laoa, sa fai fa'atasi. O matai po'o sa'o, sa filifili mai i e na soifua a'e lava i nu'u ma nofo tuāvae i matai, ma o le mafua'aga lea o le upu, " o le ala i le pule o le tautua."

FEALOA'I O AIGA.

O le va fealoa'i i totonu o le aiga, o se mea na matuā mamalu lona tausia. E lē so'ona la'a se tasi i le mea e alala ai le matai. E lē solia fo'i e se tuagane le mea o i ai tofaga o le tuafafine. O tamafafine, e ta'ua o tamasa, o se'etalāluma ma feagaiga a aiga. E tausii fa'apelepele e tama tane o aiga i latou. O le fealoaloa'i ma le fetausia'i sa fai lava lea ma ma'a tulimanu o le aiga Samoa. E lē tau fa'atonuina le tautuaina o le matai i aso ta'itasi, auā ua iloa lelei lava. O le a'oa'oina fo'i o fanau, sa a'oa'oina lava i upu ma tala, tala o aiga, tala o nu'u ma le va tuā'o'i, tala i le aganu'u e soifua ma ola ai. E leai se tama po'o se teine Samoa na ola e le'i atamai ai. Sa usu le aiga i fatuaiga fa'atonuina e le matai, ae usu fo'i le sa'o i le saofa'iga a le nu'u. O le pulega fa'ale-nu'u sa fa'amalosi-'au ma leoleo le nu'u i tulafono ma faia fa'asalaga. E lē i ai i se aiga se malosi'aga e fa'asala ai Io latou aiga totino, se'i vagana le nu'u o lo'o iai le malosi'aga, e tuli'esea ai le tagata mai lona aiga ma fa'atama'ia ana mea totino, ina ua fia tofotofa i le pulega a le nu'u.

VA TUAOI.

O le tausia o le va lelei ma tuā'o'i, na soifua ai aiga i le filemu ma le to'amalie i le tele o aso e aunoa ma ni vevesi. O le tausia o le na tulaga na alu ai a latou mea tāua. Sa a'oa'oina fanau, "aua nei si'i pe togi se soi" pe "aua nei si'i se ta i le tuāoi." A o'o ina lalaga ma felafoa'i upu o le va o aiga tuā'o'i, sa teuteu lava i le aganu'u ma fa'atumauiina ai le nofo fealofani. Ma sa fa'atinoina lava lenā nofo lelei i le fetausia'i ma le fetufaa'i. A fai fo'i se galuega a se aiga, e o ane uma lava tuā'o'i e fai fa'atasi ma galulue fiafia ai. O alāfua na fa'ata'oto mai e tupulaga ma tupulaga ua au-tausagā o nu'u, ua matuā faigata lava i se tagata ona toe taumafai e suia. O aso ua mavae sa leai ni fale papalagi, po'o ni fale tapunipuni, ae na o fale Samoa sa fa'aigoaina o afolau. A vela le saka, e muamua fa'atea le mea tausami a le Faifeau, le sa'o, ma le matua tausii i le tuā'o'i po o le tou aiga fo'i.

FAIGA-LOTU I AFIIFI.

O aso anamua e malu ane loa le afiifi, fa'atae'ele uma tamaiti ma sauni mo le faiga-lotu. O le lotu lea, o le isi lea mafutaga fa'ale-aiga. A ma'ea le lotu ona fesili lea o le tamā, pe a mai feau sa feagai ai i le aso. O le taimi fo'i lea e fai ai tofiga a le tamā mo le aso fou. O oe Simi e usu e fagota, a'o oe Sione e te alu i le ma'umaga. A a'e le faiva o le taule'ale'a, e sasa'a uma i luma o le matai o le aiga, e fai ai lana fa'asoa. E fa'asoa i le Faifeau, ma fa'asoa fo'i i tuā'o'i.

O TUAGANE MA TUAFAFINE.

O le i'oimata o le tuagane o lona tuafafine. Ua uma ona fa'amatala atu le va o le tama ma le teine, po'o le tuagane ma lona tuafafine, "o se va e tapuia ma sa." O le tuafafine lava ia na o le nofo lava e tapena le fale ma va'ai matua. Afai fo'i e va le fogātia i le va o ona tuagane, o le tuafafine lava e tu i le va. O aso anamua, po'o fea lava e alu i ai le tuafafine, e mulimuli ai lava le tuagane, e le o se isi itu, a'o le fa'ataunu'uina o ona tiute, e oti lava i le puipuiga o lona tuafafine po'o lana feagaiga. E fa'apea fo'i ona popole le tuagane i le tausiana o lona va ma le tuafafine, auā o lana feagaiga i le talitonuga o Samoa, e ala mai i le tuafafine mala o le tuagane. E pele i le tama lona tuafafine, e fa'apenā fo'i ona pele le tuagane i lona tuafafine. E ave uma lava e le teine mea lelei mo le fanau a lona tuagane, e fa'apenā fo'i i le tuagane i le fanau a lona tuafafine.

(2). "AIGA O ASO NEI."

O lo'o ta'oto mau pea le fa'avae o aiga Samoa. E 'auga mea uma i le matai po'o le sa'o. A o le fa'atinoga i aso ta'itasi, ua tele le suiga ua iai i aso nei. Ua lē gata ina fai le fale o le ulugali'i ma le fanau, a ua fai fo'i a lāua lava mea totino. Ua fai fo'i lo la tunoa, o le mea na matuā ilitata ai tele aiga faitete, auā o le tunoa lenā, e fa'atoā pusa i le Aso Sa. O le tautuaina fo'i o le matai i aso ua mavae, ua seāseā ona va'aia i aso nei. Ua fa'asaga lava le matai ia ma lona to'alua ma le fanau i lo latou tausiga. O sua fo'i sa fu'e i le matai i Aso Sa ua lē toe va'aia. O fa'alavelave tutupu fo'i e sauni ai si'i-alofa, pau lenā o le ala o lo'o mafai ona fa'atasi ai aiga i aso nei. A o le mea fo'i ua maitauina, ua fai lava le fa'alavelave o le ulugali'i ia ma le lāua fanau.

1. MATUA.

O matua le pogai ma le autū o mea uma i totonu o le aiga. O lāua o ta'ita'i, o lāua o faia'oga, o lāua o fa'amasino i totonu o aiga. O le fa'amautuina o aga tausā'afia a le fanau ma le aiga, e aupito mamafa le fatuaiga a matua, pei o le nei: 'a'oa'oina o le fanau, mai le laititi o le tama ma le teine Samoa e fafaga i upu ma tala, fa'asino i le tulou pe a savali i tafatafa o tagata. A'o le'i alu i fafo le tama po'o le teine, ia fa'amanatu i ai; aua le tautala tu, aua le 'ai savali. E sa ona 'ai i meaai a matua, e sa fo'i ona e tali se upu a se matai o le nu'u, ia e ava i ou tuafafine po'o ou tuagane, a malu le afiifi vave mai i le fale, ia fai le lotu ua uma ona tae'ele. E le'i tu'ufauina e matua ua mavae fanau, o mo'omo'oga alofa ne'i vale tu'ulima lo latou olaga i le lumana'i. Peita'i, e a aso nei? Ua tele le sa'olotoga ua ave i fanau.

2. FANAU.

O suiga ua aliali mai i fanau ua tupu ai le popole. O le aganu'u e matuā tapu le va o le tuafafine ma le tuagane. E 'ave le fa'amuumua ma le fa'aaloalo a le tuagane i le tuafafine. O teine e feagai ma galuega māmā i totonu o le fale. O tama e feagai ma galuega mamafa i fafo ma saunia taumafa. E mu mata o le tama i le tausiga o le teine. E tali filemu lana taumafataga e gaosi e lona tuagane. O aso nei ua matua leaga le suiga ua iai, Ua lē toe malu tuafafine i tuagane, ua mu mata o le teine i le umukuka, laulau mea'ai le teine ae 'ai muamua le tuagane, ua pusa fo'i e le teine le umu ma moa le vao, ae na o le fa'atai o le tuagane ma fai ana tifiga fa'ainoino tagata. O le fealoaloa'i ma le fetausia'i i le va o le tuagane ma le tuafafine, na manuia ai fanau i aso ua mavae. Ua lē o toe to'atele ni fanau fa'apea o va'aia i aso nei. O le ava lava i matua e umi ai le ola o le fanau. E iloa gofie fanau o lo'o a'oa'oina pea le va lea, e ola tausa'afia ma fa'afetaia e tagata.

3. MATUA TAUSI.

O aso anamua peiseai o le 'auga lea o se aiga Samoa, o se matua tausī e ave uma i ai mea sili, e tausī fa'apelepele ma fa'amalie ona mana'oga. E lē seiloga o le tamā ma le tinā moni, ae o nisi fo'i o nai lo'omatutua ma toeiina o le aiga. O tagata fa'apea o se aiga Samoa, e matuā tausī ma le fa'aeteete, o le talitonuga fa'a-Samoa, e ala mai ai manuia o fanau. Ae a aso nei?

4. TAU AIGA.

E masani ona i ai i aiga Samoa isi tagata e lē o ni fanau moni, a o aiga fanau a uso po o ni fanau a fanau. O le aganu'u la a Samoa, e alofa ma tausī lelei tagata uma, o le ala fo'i lea e tautua tutusa ai tagata uma i le faiga o le aiga, O le tamā lava ma le tinā o le aiga e avatua le fa'ata'ita'iga o le tausiga o tau aiga ua latou nonofo. O le upu masani a le atunu'u; "e leai se tagata e vale, fai lelei pea tagata-'ese, auā e lē iloa ala o vae, e lē iloa le lumana'i o le fanau pe te'i ua nonofo fa'apea i le aiga. Ia e alofa i le tagata-'ese. O fai pea lea faiga i aso nei?

5. TAUTUAINA O LE MATAI O LE AIGA.

E tautua tagata uma i le matai po'o le sa'o. O i latou uma o lo'o nonofo fa'atasi ma le matai o le aiga i totonu o le lau'ele'ele o le nu'u, e faia le tautua i aso ta'itasi. O le tāua lenā o le tautua nofo tuāvae, auā e i'u ina pule i se aso. O le matai taule'ale'a e feagai ma le matai i aso uma, o ia e fa'alogi i upu, maitau aga uma a le aiga ma le nu'u, e femulimulita'i i le matai i so'o se mea e alu iai le matai. O toe fa'apea i aso nei?

6. VA MA TUĀO'I I ASO NEI.

O aso nei, ua a'ai lava le aiga ia ua aunoa ma le toe fetufaa'i, se'i vagana ua tele ni taumafa. Ua o'o fo'i i le fesuea'i o le masima ma le tauaga sa masani mai ai, ua seāseā. O le fesoasoani fo'i i galuega ua lē toe va'aia, se'iloga o le tupe fa'atoa mafai ona alu e fesoasoani. A vevesi fo'i tuāo'i i aso nei, ua lē toe teuteua i le va fealoa'i, a ua ave i le malo ma le tulafono. O le tufa atu fo'i o le 'ulu tunu ma tufa mai le pe'epe'e so'a'a, ua leai, se'i vagana mea'ai lelei ua fetufaa'i ai. O aso nei ua malosī le si'i tuāo'i, a o le mau mai anamua a le atunu'u, o le tagata si'i tuao'i ma togi le soi, e lē umi lona soifua ae oti.

UPU FAAIU

O lo'o tā'ua i le Tusi o Teuteronome: *"A fa'ao'oina oe e le Ali'i lou Atua i le nu'u na ia tauto ai i ou tamā, o Aperā'amo, o Isaako, ma Iakopo, e avatu iā te oe, o a'ai tetele ma le lelei, e te le'i faia, o fale fo'i e tutumu i mea lelei uma, na e lē fa'atutumuina, o vaieli fo'i e te le'i elia, o tovine ma olive e te le'i totōina, a e 'ai ai, ma e ma'ona ai, ia oe, ne'i galo iā te oe, o le Ali'i na aumaia oe nai le nu'u o Aikupito, o le mea sa outou nofo pologa ai."* (Teuteronome- 6: 10 – 12). O le agaga maualuga lea o le mataupu mo lenei vaiaso tāua o le Aso Fa'afetai. O le aganu'u a Samoa i ana tu ma ana aga malie, na fofoina mai ai ma fa'afaileleina ai o tatou tuaā ma o tatou matua, fa'atasi ai ma tatou nei... **aua nei galo iā te i tatou ona fa'afetai a'e i le Atua.** O tu ma agaifanua a le tatou atunu'u na mamalu ai mea e fai, ma malu puipuia ai Aiga, Nu'u, ma Ekalesia i ia ona po. Ae a tatou fesili ifo i tatou iā i tatou lava; Po'o mamalu pea lava ia tu ma aga? Po ua fa'agaloina ea e i tatou ia tu ma aga matagofie? Ua lē toe taumateina le 'televave o le soifuaga ua tatou i ai i nei ona po, e lē gata i totonu o Samoa ae fa'apea fo'i i atunu'u e mamao. A o le fafagu a lenei mataupu, ina ia aua nei galo ona fa'afetai i le Atua mo lo tatou tofi o Samoa ma ana aganu'u ua maua ai lo tatou tofi. Ma le tatalo ia fa'atumauiina le aganu'u Samoa e fai ma o tatou fa'avae mautū ma le mausalī. E pei ona tā'ua, **"E sui lava faiga, ae tumau pea faavae."** Tatou toe tepa i tua ma le agaga fa'afetai i fa'avae na sau ai le olaga o le Samoa i aso ua tuana'i, ia avea lea ma ala e mafai ai ona tatou va'ai i luma ma le fa'amoemoe, e fa'atumauiina pea le fa'a-Samoa i totonu o le fefiloi o tu ma aga 'ese'ese a le lalolagi, aua lava nei galo le fa'asinomaga lenā i tupulaga talavou o le vaitau o suiga, e tāua mo lo latou olaga nei ma a taeao. Ia sui a faiga, ae tumau pea faavae.

FA'ATINOGA O LE MATAUPU.

** Fa'ailoa ma fa'amalamalama le mataupu o le a feagai ma le Autalavou i lenei Aso Sa.

** E fautuaina afai e mafai ona fai ni kopi mo le Autalavou, o se mea lelei tele lea, o le a faigofie ai ona malamalama le mataupu, ona e fai si tele ma loloto.

** Fetufaa'i le ta'ita'i ma le Autalavou i vaega ua fa'amamafaina o le mataupu, ina ia maua mai ai le fa'amoemoe ua tulimataina: (Aiga o ananafi ma Aiga o aso nei).

** Fesiligia le Autalavou i ni o latou talitonuga i vaega nei:

(i). Aisea ua mafua ai le 'ese'esega o Aiga ananafi, pe a faatusa mai i Aiga o aso nei?

(ii). O fea o Aiga o ananafi ma Aiga o aso nei, e te manatu ua tataua ona fa'atumauiina mo le ola o tagata?

(iii). Pe ana fa'apea o oe o le Aiga o aso nei, ae sa e ola i le Aiga o ananafi:

O a ni vaega tāua o le aiga ananafi, ua lē toe iloa i Aiga o aso nei?

O a ni vaega o le Aiga ananafi, ua lē toe talafeagai mo Aiga o aso nei?

** Fa'aiu i se Pese o le Aso Fa'afetai, ma le tatalo fa'aiu.

Manuia tele le Aso Fa'afetai.

TESEMA 01, 2019. "SU'ESU'EGA I LE TUSI PAIA."

MATAUPU: "O LE FALEMANU, O LE AVANOA O TAGATA UMA IA IESU"

TUSI FAITAU: LUKA – 2: 8 – 20.

SINI O LE MATAUPU: "E AVANOA TUTUSA TAGATA UMA I LE ALOFA TUNOA O LE ATUA"

UPU FAAFEILOAI:

Fa'atalofa atu i lau Susuga i le ta'ita'i, fa'apea le maualuga o le Autalavou i lenei Aso Sa. O le tatou mataupu i lenei afiafi e pei ona tā'ua i luga, 'O le falemanu, o le avanoa o tagata uma ia Iesu.' O le tasi lea mataupu silisili aupito tāua o le falemanu. Ua manatu e aumai tatou te fa'asoa ai ma iloa ai le alofa tunoa lē fa'atuāo'ia o le Atua i le tagata. E fai fo'i ma fa'amanatu tāua i so'o se talavou ma tatou uma, tatou te mafaufau ai i le silisili-'ese o faiga a le Atua, ae maise o lona alofa, e lā fa'ailogaina tagata, ae tutusa ai tagata uma.

FESOASOANI FA'AOPPOPO.

O le tala lava ia a Luka i le fanau mai o Iesu, ma lavasiga 'ese'ese o lea po, o lo'o manino lelei lava ma malamalama, pe a tatou faitau lelei i le Tusi Paia e pei ona aumai. Peita'i, o lo'o vavala mai i tua atu o lenei tala, se feau aogā ma silisili mo le lalolagi ma tagata uma lava. Auā o Iesu lava ia o le tupu sa valoia mai e Perofeta, o ia le pogai ma le autū, lea ua soifua mai. Ae o le maitauga i tagata na fa'ailoa iai agelu, e tusa o le tala i le soifua mai o le tupu, ma le nofoaga na soifua mai ai le tupu, o i'inā tonu e mafua ai ona titi'e a'e se lagona, ma lagā ai nai fesili ia. Aiseā ua fa'aali ai i leoleo mamoe? Aisea ua fanau mai ai i le falemanu? E iai ni mafua'aga o ia mea? E iai ni feau tāua ma aogā o ta'u mai e ia mea? Ioe, o i'inei tonu tatou te malamalama ai i le Atua ma le uiga o lona alofa.

(i). Leoleo mamoe.

E lē toe tau fa'amatalaina le uiga o le galuega fa'aleoleo mamoe, pau le mea ua tatou mautinoa; o le leoleo mamoe, e lē o se tagata tau'aloa. E faitauina fa'atasi ma tagata vaivai ma maualalalo. E feagai ma manu i le olaga atoa, auā o le uiga lea o la latou galuega ma le mea e nonofo ai. E lavalava palapala; e lē tumamā fo'i (tulou), pe a fua i le galuega. E fia 'ai ma fia inu pe ā naumati ma mativa le lau'ele'ele. E lamatia fo'i lona ola e manufe'ai, ona o le puipuiga o si lafu. Ae ua fa'aali lava le Atua i tagata le tau'aloa ma vaivai, o le fa'ailoga lea o lona amanaia ma lona alofa, e aofia ai tagata uma.

(ii). Fale-manu

O le upu moni, e lē faigatā i le Atua ona tapena se Maota Sili ma matagofie e soifua mai ai Iesu lona Alo pele e to'atasi. Ae ua tatou iloa fo'i, afai e soifua mai Iesu i se maota Sili, ona taga fo'i lea i ai na o Tupu ma tagata mamalu ma aloa'ia, ae taofia ma poloka i fafo e sikulaki tagata palapala ma vaivai. Ae lelei le fale-manu; e lē sa ai se tagata e to'atasi, vagana le tagata inoino ma fia tausī mamalu, ona lē fia alu lea i le tupu. Ioe! ua filifilia e le Atua lenei nofoaga, e avanoa tutusa i ai tagata uma, le vaivai ma le mativa, le tupu fo'i ma le tamaoa'iga.

GALUEGA FAATINO:

1. Vaevae muamua le Autalavou i vaega e 2, pe 3 fo'i pe a to'atele. Ona ave lea i ai se 5 minute, e faitau ai fa'atasi pe fa'alua fo'i le Tusi Faitau.
2. E lelei ona toe faitau i le Autalavou e lau Susuga i le Ta'ita'i mai le Upu Fa'afeiloai, se'ia uma le vaega o le fesoasoani fa'aopoopo. Pe mafai ona e faitau lemū ma manino mo latou uma, a'o fa'alogi ma mafaufau i le Tusi Paia sa faitauina.
3. Ave se 15 minute, e saili mai ai e Vaega ta'itasi nisi "Mataupu Silisili" (taua, aogā, lelei) o maua mai le tala sa faitauina. So'o se mataupu silisili e aofia ai tagata falemanu, ma so'o se mea o iloa i le tala.
4. Tula'i failautusi o vaega tolaulau a latou mataupu silisili, ma fa'amatala auiliili uiga o ia mataupu silisili (5 minute a le vaega)

Tu'ufa'atasi i se fetufaa'iga lautele, ona fa'aiu lea i se saunoaga autū a lau Susuga, e fa'amamafa ai le Mataupu Silisili o fai ma Mataupu o lenei Aso Sa – "O le fanau mai o Iesu i le fale manu (fale povi), o le fale e matala ona itu uma e fa, o le fale e leai ni ona faitoto'a, e le lokaina, ae avanoa ma matala mo tagata uma.

O Iesu lava lea ua soifua mai mo i tatou ma le lalolagi uma; e avanoa o Ia mo so'o se tagata, vagana le tagata e lē avanoa lona loto e afio ai le Ali'i, ona ia le mafuta lea i le Alii. O lau meaalofa sili fo'i lea mo le Tupu: ***talitonu ma talia o Ia i lou loto fa'atuatua moni.***

Manuia le Etiveni.

////////////////////////////////////

TESEMA 08, 2018 – IANUARI 05, 2020. - TU'UAGA MO LE KIRISIMASI MA LE TAUSAGA FOU.

MANUIA LE KIRISIMASI MA LE TAUSAGA FOU.

////////////////////////////////////



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org